

四庫全書

經部

欽定四庫全書

經部

周禮註疏刑翼卷十四

詳校官監察御史

臣徐如澍

刑部郎中

臣

許兆椿覆勘

總校官編修

臣

王燕緒

校對官中書

臣

宋枋遠

謄錄監生

臣

樊寅捷

欽定四庫全書

周禮註疏刪翼卷十四

明 王志長 撰

大司樂掌成均之灋以治建國之學政而合國之子弟
焉註鄭司農云均調也樂師主調其音大司樂主受此
成事已調之樂董仲舒云成均五帝之學成均之灋其
遺禮可灋者國之子弟公卿大夫之子弟當學者謂之
國子文王世子曰於成均以及取爵於上尊則周人立

此學之宮

疏建立也周人以成均之舊式立國之學政而合聚國之子弟將以此教之○又云按王制王太子王子公卿大夫元士之適子國之俊選皆造焉此不言王太子王子與元士之子及俊選者引文不具云弟者則王子是也自公以下皆適子乃得入引文王世子者彼鄭注云董仲舒曰五帝名大學曰成均則虞庠近是也天子飲酒於虞庠則郊人亦得酌於上尊以

相旅○又云堯以上當代學亦各有名無文可知但
五帝總名成均當代則各有別稱謂若三代天子學
總曰辟雍當代各有異名也○易氏曰成者成其行
之虧均者均其習之偏○三禮義宗云自虞至周凡
四代之學虞夏及殷各立其學周則兼而立之有虞
大學為上庠小學為下庠夏后氏大學為東序小學
為西序殷大學為右學小學為左學周大學為東膠
小學為虞庠○文王世子注周立三代之學學書於

有虞氏之學典謨之教所由興也學舞於夏后氏之學文武中也學禮樂於殷之學功成治定與已同也

○王制疏云學名異者四代相變或上西或上東或貴在國或貴在郊○雜說周禮全不言太子惟諸子職及一語其他但言國子庶子子弟蓋古者太子入學則以齒論太司樂便是教太子官○雜說先王思慮最遠國子弟與國家相終始既與其父兄共維持當時天下到子孫時其弟子亦與共效維持之力子

弟善見得後日子孫天下必治反是則可慮者在國
家矣血脉關節常相聯絡不可不深長思也○文王
世子曰行一物而三善皆得者唯世子而已其齒於
學之謂也故世子齒於學國人觀之曰將君我而與
我齒讓何也曰有父在則禮然然而衆知父子之道
矣其二曰將君我而與我齒讓何也曰有君在則禮
然然而衆著於君臣之義矣其三曰將君我而與我
齒讓何也曰長長也然而衆知長幼之節矣故父在

斯為子君在斯為臣居子與臣之節所以尊君親親也故學之為父子焉學之為君臣焉學之為長幼焉父子君臣長幼之道得而國治語曰樂正司業父師司成一有元良萬國以貞世子之謂也

凡有道者有德者使教焉死則以為樂祖祭於瞽宗註道多才藝者德能躬行者若舜命夔典樂教胄子是也死則以為樂之祖神而祭之鄭司農云瞽樂人樂人所共宗也或曰祭於瞽宗祭於廟中明堂位曰瞽宗殷學也

泮宮周學也以此觀之祭於學宮中

疏文王世子云禮在瞽宗書在上庠鄭注云學禮樂於殷之學功成治定與已同則學禮樂在瞽宗祭禮先師亦在瞽宗矣若然則書在上庠書之先師亦祭於上庠其詩則春誦夏絃在東序則祭亦在東序也故鄭注文王世子云禮有高堂生樂有制氏詩有毛公書有伏生是皆有先師當祭可知○王氏曰周官三百六十無云死以祭者重道之極也○東萊呂氏

曰大司樂既掌學政教國之子弟有餘矣猶退然不敢自足延請有道德者敬事之使之教國之子弟以此見古人心至公義理之無窮規模之無疆界大抵設教受教當知無窮意思死則配食樂祖祭於學校不特尊師敬長之義由是慎終追遠民德歸厚亦是當時有道德者教之大抵周官叙事之法簡而有餘死為樂祖祭於瞽宗其選擇之精可知○陳氏禮書曰四代之學虞則上庠下庠夏則東序西序商則右

學左學周則東膠虞庠而周又有辟雍成均瞽宗之名則上庠東庠右學虞庠大學也故國老於之養焉下庠西序左學虞庠小學也故庶老於之養焉記曰天子設四學蓋周制也周之辟雍則成均也東膠則東序也瞽宗則右學也蓋辟明也雍和也所以明和天下以其明之以法和之以道則曰辟雍以其成其虧均其過不及則曰成均以習射事則曰序以糾德行則曰膠以樂祖在焉則曰瞽宗以居右焉則曰右

學夫諸侯之學小學在內大學在外故王制言小學
在公宮南之左大學在郊以其選士由內以升於外
然後達於京故也天子之學小學居外大學居內故
文王世子言凡語於郊然後於成均取爵於上尊以
其選士由外以升於內然後達於朝故也○長樂劉
氏曰周有天下立四代之學虞庠則以舜為先聖夏
學則以禹為先聖殷學則以湯為先聖東膠則以文
王為先聖各取當時左右四聖成其德業者為之先

師以配享焉此天子立學之法也○陳氏禮書曰王制命鄉簡不率教者至於四不變然後屏之小樂正簡國子之不率教止於二不變則屏之者先王以匹庶之家為易治膏粱之性為難化以其易治故鄉遂之所攷常在三年大比之時以其難化故國子之出學常在九年大成之後三年而攷故必四不變然後屏之九年而簡則雖二不變屏之可也古之學政其輕者有鞭撻其重者不過屏斥而已若夫萬民之不

服教其附於刑者歸於士○愚按古者設師保等官
教國子而世子亦齒焉是時王子與公卿大夫士之
子幼則同學長則同事其同學也有朋友麗澤之益
其同事也有明良翼贊之功故周禮一書不載儲宮
之官蓋人未有生而貴者王子之入學也一國子而
已矣秦漢已來始加置詹事中庶子等官而王子之
學與國子迥然不侔朱子語錄稱唐六典載東宮官
制甚詳如一小朝廷宋東宮官屬極苟簡左右春坊

不進賢德每用武弁之小有才者贊善大夫諸官又
但為階官非實有職業儲教之不古若有由然
矣

以樂德教國子中和祇庸孝友註祇敬庸有常也

公羊注八音者德之華也歌者德之言也舞者德之容也
以樂語教國子興道諷誦言語註興者以善物喻善事
道讀曰導導者言古以剴今也倍文曰諷以聲節之曰
誦發端曰言答述曰語

疏言古剴今謂若詩陳古以刺幽厲王之類倍文曰
諷謂不開讀之以聲節之為誦者亦是倍文但諷是
宣言之無吟咏誦則為吟咏以聲節之為異○潛谿
鄧氏曰興者托物興事道者依古剴今皆博喻無指
斥諷者微言寓意誦者咏歎達情皆委婉無直致以
興道諷誦為言語中和之德言也○愚按人身唯詞
氣不可強為苟非中正和樂之德積中發外則剛柔
疾徐必有乖戾不中節者此古人所以有樂語之教

也總之樂德盡之矣語其德之聲舞其德之象歟
以樂舞教國子舞雲門大卷大咸大磬大夏大濩大武
註此周所存六代之樂黃帝曰雲門大卷言其德如雲
之所出民得以有族類大咸咸池堯樂也堯能殫均刑
灋以儀民言其德無所不施大磬舜樂言其德能紹堯
之道也大夏禹樂禹治水傳土言其德能大中國也大
濩湯樂湯以寬治民而除其邪言其德能使天下得其
所也大武武王樂言其德能成武功

疏卷者卷聚之義即族類也咸皆也池施也德無不
施解咸池之義○陳氏樂書曰莊周嘗謂黃帝之咸
池又謂黃帝張咸池樂於洞庭之野呂氏春秋漢志
白虎通亦謂黃帝作咸池則咸池為黃帝樂信矣鄭
氏溺於世次先後之說耳咸池雖作於黃帝而堯亦
修而用之雲門大卷大章所以表堯之體天道也咸
池所以大堯之體地道也○玉海樂記大章章之也
注堯樂名言堯德之章明也周禮缺文或作大卷言

護者即救護也按元命包云文王時民樂其興師征
伐故曰武又詩云文王受命有此武功則武者文王
樂名武王卒其功伐故周公作樂以為武王樂也○
又云此大司樂所教是大舞樂師所教者是小舞按
內則云十三舞勺成童舞象舞象謂戈皆小舞又云
二十舞大夏即此六舞也特云大夏者鄭云樂之文
武中其實六舞皆學也保氏云教之六樂二官共教
者彼教以書此教以舞故共其職也○陳氏曰大夏

以上其執以羽籥文舞也大濩以下其執以干戚武舞也○夾漈鄭氏曰古有六舞後世所用者韶武二舞而已後世之舞亦隨代皆有制作每室各有形容然究其所常用及其制作之宜不離是文武二舞也臣疑三代之前雖有六舞之名往往其所用者亦無非文武二舞故孔子謂韶盡美又盡善武盡美矣未盡善不及其他誠以舞者聲音之形容也形容之所感發惟二端而已自古制治不同而治具亦不離文

武之事也然雲門大咸大韶大夏大濩大武凡六舞
之名南陔白華華黍崇丘由庚由儀凡六笙之名當
時皆無辭故簡籍不傳惟師工以譜奏相授耳古之
樂惟歌詩則有辭笙舞皆無辭故大武之舞秦始皇
改曰五行之舞漢高帝改曰文始之舞魏文帝復文
始曰大韶舞五行舞曰大武舞竝有譜無辭雖東平
王蒼有武德舞之歌未必用之大抵漢魏之世舞詩
無聞至晉武帝泰始九年荀勗曾典樂更文舞曰正

德武舞曰大象使郭夏宋識為其舞節而張華為之
樂章自此以來舞始有辭而有辭失古道矣○薛氏
圖云周所以用六代之樂者存三恪與二代也三恪
謂黃帝堯舜之後二代夏商之後樂記曰封黃帝之
後於蓊以下是也周人既法其法故兼用其樂也○
伊川程氏曰樂舞所以舒其性情也古人為學自入
小學以至大學舞勺舞象有絃歌以養其耳有干羽
以養其血氣有禮義以養其心如此則非僻之心無

自而入○後儀王氏曰書言舞于羽則先干而後羽
樂記言干戚羽旄謂之樂則先干戚而後羽旄郊特
牲明堂位祭統皆先大武而後大夏詩簡兮先萬舞
而後籥翟漢樂先武德而後文始唐樂亦先七德而
後九功然則古人之舞皆先武而後文蓋曰平難常
在於先守成常在於後○陳氏曰周之時干戈羽籥
在東序絃誦與禮在瞽宗書在上庠以言學者之事
始於書立於禮成於樂而舞又樂之成焉故大司樂

言樂德樂語而終於樂舞樂師言樂成告備而終於
臯舞孟子仁義智禮樂之實而終於不知手之舞之
記曰詩言志歌咏聲而終於舞動容春秋時季札歷
觀樂歌然後及於象武韶夏之舞舞之始也發於所
樂之極其用也常在諸樂之後此舞所以爲樂之成
也由小學之書以進於瞽宗之禮樂由瞽宗之禮樂
而成之以東序之舞則周之教法可知矣○文獻通
攷先公曰西漢博士隸太常有周成均隸宗伯之意

州有博士郡有文學掾五經之師儒宮之官長吏辟
置布列郡國亦有黨庠遂序之意然有二失鄉里學
校人不升於太學而補弟子員者自一項人公卿弟
子不養於太學而任子盡隸光祿勳自有四科考試
殊塗異方下之心術分裂不一上之攷察馳騫不
精○東萊呂氏曰唐虞三代設教與後世學校不同
即學宮一事可見在舜時命夔典學教胄子在周時大
司樂掌成均之法教國之子弟何故皆是掌樂之官

掌教蓋其優遊涵養鼓舞動盪有以深入人心處却不是設一箇官司秦漢以後誤作官司故與唐虞三代題目自別雖足以善人之形而不足以善人之心周禮一書若師氏保氏大司樂大胥小胥之類所教者不過國子當時鄉遂所以興賢能未嘗見其設教之官蓋學校事大體重非有司簿書期會之可領此學者所當深思也然舜之時雖國子外不見有掌教之官而庶頑譏說若不在時候以明之撻以記之書

用識哉欲竝生哉工以納言時而黷之如此之備周
人學官雖不領於一屬然而比年入學中年考校一
年視離經辨志三年視敬業樂羣五年視博習親師
七年視論學取友謂之小成九年知類通達強立而
不反謂之大成終始備具至於不率教者屏之遠方
終身不齒又見先王未嘗有理無事有體無用本末
亦是備見○愚按蒙之二父大司樂之職也周公繫
辭特廢國而言家廢臣而言子蓋養中養才直父兄

養子弟之事非官司臨百姓之事呂氏之言洵可以
相發明矣

以六律六同五聲八音六舞大合樂以致鬼神示以和
邦國以諧萬民以安賓客以說遠人以作動物註六律
合陽聲者也六同合陰聲者也○按黃鍾大簇姑洗蕤
賓夷則無射為六陽大呂應鍾南呂林鍾仲呂夾鍾為
六陰此十二者以銅為管轉而相生黃鍾為首其長九寸
各因而三分之上生者益一分下生者去一焉國語曰

律所以立均出度也古之神瞽攷中聲而量之以制度
律均鍾言以中應定律以律立鍾之均大合樂者謂徧
作六代之樂以冬至作之致天神人鬼以夏至作
之致地祇物魁動物羽羸之屬虞書云夔曰夏擊鳴球
搏拊琴瑟以詠祖考來格虞賓在位羣后德讓下管鼗
鼓合止祝敔笙鏞以間鳥獸蹌蹌簫韶九成鳳凰來儀
夔又曰於予擊石拊石百獸率舞庶尹允諧此其於宗
廟九奏效應

疏轉而相生已下據律歷志而言子午已東為上生
子午已西為下生上生為陽陽主息故三分益一下
生為陰陰主減故三分去一按律歷志黃鍾為天統
律長九寸林鍾為地統律長六寸太簇為人統律長
八寸又云十二管相生皆八八上生下生盡於仲呂
陰陽生於黃鍾始於左旋八八為位者假令黃鍾生
林鍾是歷八辰自此以下皆然是八八為位蓋象八
風也中聲謂上生下生定律之長短均即是應律長

短者○按國語注均者均鍾木長七尺有絃繫之以均鍾者度鍾大小清濁也○張衡賦攷理亂於律均注樂叶圖徵曰聖人承天以立均宋均注均長八尺施絃以調五聲六律○貴與馬氏曰按古人言律為萬事本度量衡皆由焉律以和聲度以審度量以嘉量衡以權衡度有長短量有大小衡有輕重雖庸愚之人皆能知之至律之於聲其或雅或淫或和或乖則雖賢哲之士不能遽曉蓋四者之中議律為難度

或長或短量或小或大衡或輕或重三物皆生民日用不可闕者然以四海九州觀之未有千里而同一度量衡者也以古往今來觀之未有千里而同一度量衡者也蓋隨世立法隨地從宜取其適於用而初無害於事固不必盡同也至律則差之絲忽不能以諧聲聲不諧不足以爲樂樂不和不足以致治蓋四者之中制律爲尤難是以古人之於律或求之於絲竹伶倫之管京房之準是也或求之於金石編鐘編

磬鐻鐘簠磬之屬是也雖曰假器物以求之然心之
精微口不能授性所解悟筆不能書假如有人與后
夔伶倫並世而生亦豈能盡得其依律和聲之法乎
後之儒者病樂之不和議欲更律而更律之法或取
之纍黍或求之古之度量然纍黍之法漢制特以較
度量衡所謂黃鍾之長黃鍾之侖黃鍾之重云者特
以明三物之與律相表裏耳未嘗專言纍黍以為律
也至於古之度量則周黼漢斛與魏晉以來尺十

有五種相去且千年其流傳至於今者是乎非乎不可得而詳也倘其果為古器則不知造此器之時其與虞朝之同律度量衡周王之攷制度果無纖毫之差乎亦不可得而詳也而方俛俛然於千百載之後搜求古雅之器於荒丘古墓之中而自以為得之蓋亦疎矣蓋律度量衡雖曰相為表裏然至易曉者度量衡也至難知者律也隨時而變易屢易而無害於事者度量衡也一定而不易易則害於樂者律也今

失其難者而反取則於其易者失其不可易者而反
取則於其屢易者何哉竊以為必欲製律必如杜夔
荀勗阮咸張文收之徒自有宿悟神解而後可以語
此如其不然或專求之於累黍或專求之於周髀漢
斛魏尺之屬毋異刻舟而尋劍也李照胡瑗房庶之
說皆以黍求律者也范蜀公力主房庶之說以為照
以縱黍累尺管空徑三分容黍十七百三十則太長
瑗以橫黍累尺管容黍一千二百而空徑三分四釐

六毫則太短皆以尺生律不合古法今庶所言實千二百黍於管以為黃鍾之長就三分則為空徑則無容受不合之差校前二說為是累千百言大要不過如此愚請得而詰之夫古人之制律管皆有分寸如十二律管皆徑三分圍九分黃鍾之管長九寸自大呂以下以次降殺是也然則欲制律必先定分寸而古今之分寸不可攷矣是以隋書因漢制之說以一黍為一分則是十黍為一寸分寸既定然後管之徑

圀可定管之徑圀既定然後律之長短可定瑗與照雖有縱橫之異然以黍定分以黍之分定管之徑圀則一也今庶既盡闢縱橫之說而欲以是千二百黍亂實之管中隨其短長斷之以為黃鍾九寸之管取三分以度空徑則不知庶之所謂空徑三分之管既非縱黍之分復非橫黍之分則何以為分乎未有分寸不先定而可以制律者如庶之所謂分既非縱黍復非橫黍則必別有一物為度以起分倘別有一物

為度以起分則只須以其三分為徑以九十分其長
為黃鍾之管為律本不因於黍矣何煩實黍於管又
何煩於漢書中增並八字以求合千二百黍之數乎
此愚所以未敢以為通論也古律以竹為管然竹有
大小其大者容千二百不能以寸其小者不及千二
百黍而盈尺矣故必先以黍為分度之三分為徑然
後實以千二百黍則九十分其長為黃鍾之管矣愚
雖不能曉鍾律切意古人以黍定律其灋如此○陳

氏集說疏曰陽生陰曰下陰生陽曰上黃鍾三分損
一下生林鍾三分林鍾益一上生太簇三分太簇損
一下生南呂三分南呂益一上生姑洗三分姑洗損
一下生應鍾三分應鍾益一上生蕤賓三分蕤賓損
一下生大呂三分大呂益一上生夷則三分夷則損
一下生夾鍾三分夾鍾益一上生無射三分無射損
一下生中呂陰陽相生自黃鍾始也○續志五行生
於陰陽分為十二律轉生六十所以紀斗氣效物類

也天效以景地效以響即律也陰陽和則景至律氣應則灰除是故天子常以日冬夏至御前殿合八能之士陳八音聽樂均度晷景候鍾律權土灰放陰陽冬至陽氣應則樂均清景長極黃鍾通土灰輕而衡仰夏至陰氣應則樂均濁景短極蕤賓通土灰重而衡低進退於先後五日之中八能各以候狀聞太史封上效則和否則占候氣之瀟為室三重戶閉塗墁必周密布緹縵室中以木為案每律各一內庫外高從

其方位加律其上以葭莩灰抑其內端案歷而候
之一氣至者灰去王伯厚曰月令章句曰古之為鍾
律者以耳齊其聲後不能則假數以正其度度數正
則音亦正矣鍾以斤兩尺寸中所容受升斗之數為
灋律以分寸長短為度○晉志楊泉記云取弘農宜
陽縣金門山竹為管河內葭莩為灰或云以律置室
中隨十二辰埋之上與地平以竹莩灰入律中以羅
穀覆律呂氣至吹灰動穀小動為和大動君弱臣強

不動君嚴暴之應○俊卿章氏曰律候氣之管以銅
為之律中者中猶應也孟春氣到則太簇之律應應
謂吹灰也正義云角是春時之音律審正月之氣音
由氣成以其音氣相須故角律同節其太簇夾鍾六
律六呂等皆是候氣管名又計太簇管數倍而更半
鑄之為鍾名曰太簇之鍾元生於太簇之律是律在
於前鍾生於後故律歷志云黃帝制十二筩以聽鳳
凰之鳴其雄鳴為六律雌鳴為六呂是律生在前蔡

氏以為太簇鍾名先有其鍾後有其律非也陽管為律陰管為呂又陰律為同言與陽同也總而言之陰陽皆稱律故十有二月皆稱律中也○劉氏曰日者太陽之精凡天之氣以日為主月者太陰之精凡地之氣以月為主日行遲三百六十有六日乃一周天月行疾二十有九日強半乃一周天月一周天常與日會所會之次在天則為十二舍在地則為十二辰故日月會於上則陰陽合於下上下交合者十有二

而歲功成焉四時備焉萬物生焉此陰陽會行日月
交會以定寒暑而成變化者也小雪之節日會於娵
訾在地為亥其氣之合曰應鍾也冬至之節日月會
於玄枵在地為子其氣之合曰黃鍾也大寒之節日
月會於星紀在地為丑其氣之合曰太呂也雨水之
節日月會於析木之津在地曰寅其氣之合曰太族
也春分之節日月會於大火在地為卯其氣之合曰
圓鍾也穀雨之節日月會於壽星在地曰辰其氣之

合曰姑洗也小滿之節日月會於鶉尾在地為巳其
氣之合曰仲呂也夏至之節日月會於鶉火在地為
午其氣之合曰蕤賓也大暑之節日月會於鶉首在
地為未其氣之合曰函鍾也處暑之節日月會於實
沈在地為申其氣之合曰夷則也秋分之節日月會
於大梁在地為酉其氣之合曰南呂也霜降之節日
月會於降婁在地為戌其氣之合曰無射也所謂氣
之合者冬至之節陽氣在地中始生而上長也陰氣

在上而始入於地其深九寸乃與陽合而陽長上通
焉故葭灰未動黃鍾之管九寸中空皆陰氣也冬至
而陽生上實於九寸之空而葭灰動焉夏至之節陰
氣自地中始生而上長也陽氣自上而始入於地其
深六寸三分二釐強半乃與陰合而陰長上通焉故
葭灰未動蕤賓之管六寸三分二釐中空皆陽氣也
夏至而陰生上實於六寸三分二釐之空而葭灰動
焉自陰生至於冬至凡六管之長短者皆陽氣入地

之深淺而始與陰合也陰合於陽上進而葭灰飛動者皆其月之中氣也陽生至於夏至凡六管之長短者皆陰氣入地之深淺而始與陽合也陽合於陰上進而葭灰飛動者皆其月之中氣也故日月交會於上以成次則陰陽交合於下以成時取其管以為聲天地之中聲也取其律以候氣陰陽之和氣也非聖人其孰能與於此乎○朱子語錄文蔚問國語云律者立均出度韋昭註云均謂均鍾水長七尺係之以

弦不知其制如何曰均只是七均如以黃鍾為宮便以林鍾為徵太簇為商南呂為羽姑洗為角應鍾為變宮蕤賓為變徵這七律只是一均其聲自相諧應古人要合聲先須吹律使衆聲皆合律方可用後來人想不解去逐律吹得京房始有律準乃是先做了一箇母子調得正了後來只依此為準國語謂之均梁武帝謂之通其制十二弦一弦是全律黃鍾只是散聲又自黃鍾起至應鍾有十二弦要取甚聲用柱

子來逐弦分寸上柱定取聲立均之意本是如是○
又曰十二律自黃鍾而生黃鍾是最濁之聲其餘漸
清若定得黃鍾是入得樂○鄧氏曰律言述也述天
地元陽之氣宣之樂也同為律偶同於陽旅助之也
○愚按太史公志律以黃鍾為九寸後因其說而不
變朱子遂以黃鍾為聲之最濁呂氏春秋載黃帝命
伶倫取嶰谷之竹斷兩節間三寸九分而吹之為黃
鍾之宮後又有祖是說者以為黃鍾當子之中一陽

初動於卦為復則三寸九分者陽之始也故宮聲最清呂氏春秋之書未必可據然二氣初分清者居上陽為清陰為濁此不待智者而後辨也陽之初生純粹以精其為清中之清又不待智者而後辨也漢志亦曰黃鍾不復與他律為後者至尊無與並也故曰宮聲為君豈有至尊至貴者而為天下之至濁者乎○

經總言三祀大祭但天地大祭效應無文所引尚書唯有宗廟故指宗廟而言也○俊儀王氏曰三禮

義宗周公制禮用六代之樂四時祭祀分而用之祭
之尊卑凡有六等故用六代之樂以六代之樂配十
二調而作之一代之樂則用二調遠取黃帝者以舞
樂之始興於黃帝奏者謂堂下四垂鍾聲之調歌者
謂堂上琴瑟之音但一祭之中皆自為二調庭奏者
常以陽聲為調升歌者常以陰呂為聲周人用六代
之樂祭天雲門地以咸池宗廟以大磬不用時王之
樂以三樂其道最美故三祭用之宗廟加九德之歌

彰明先祖之德也大蜡盡天時四方之神而祭之其樂亦盡用四時之調凡四方十二辰則有十二律陰陽相配二調共作一代之樂故為六樂大蜡之祭則盡用之合天地四方之神合六代之樂故終不過六乃分樂而序之以祭以享以祀註分謂各用一代之樂疏分此六代之舞尊者用前代卑者用後代使尊卑有序故云序○介甫王氏曰謂分律而序之自黃鍾至無射分同而序之自大呂至夾鍾分舞而序之自

雲門至大舞以祭地亦以享人鬼以祀天神焉○易氏曰大合樂謂求神之後合六代之樂以致之分樂而序之謂薦神之際各有其序而六代之樂各以類舉○又云六律以左旋為序六同以右轉為序六舞以歷代先後為序○夾洙鄭氏曰有宗廟之樂有天地之樂有君臣之樂尊親異制不可以不分幽明異位不可以無別按漢叔孫通始定廟樂有降神納俎登歌薦裸等曲武帝始定郊祀之樂有十九章之歌

明帝始定黃門歌吹之樂天子所以宴羣臣也嗚呼
風雅頌三者不同聲天地宗廟君臣三者不同禮自
漢之失合雅而風合頌而雅其樂已失而其禮猶存
至梁武十二曲成則郊廟明堂三朝之禮展轉用之
天地君臣宗廟之事同其事矣此禮之所以亡也雖
曰本周九夏而為十二雅然九夏自是樂奏亦如九
淵九莖可以播之絲竹有譜無辭而非雅頌之流也
乃奏黃鍾歌大呂舞雲門以祀天神註以黃鍾之鍾大

呂之聲為均者黃鍾陽聲之首大呂為之合奏之以祀天神尊之也天神謂五帝及日月星辰也王者又各以夏正月祀其所受命之帝於南郊尊之也孝經說曰祭天南郊就陽位是也

疏合者據十二辰之斗建與日辰相配合皆以陽律為主陰呂合之黃鍾子之氣也十一月建焉而辰在星紀大呂丑之氣也十二月建焉而辰在玄枵是其斗與辰合也

乃奏大簇歌應鍾舞咸池以祭地示註大簇陽聲第二
應鍾為之合咸池大咸也地示所祭於北郊謂神州之
神及社稷

疏黃鍾之初九下生林鍾之初六林鍾之初六上生
太簇之九二是陽聲之第二也太簇寅之氣也正月
建焉而辰在姬訾應鍾亥之氣也十月建焉而辰在
析木是應鍾為之合也○信齋楊氏曰愚按大司樂
奏大簇歌應鍾舞咸池以祭地示鄭注云地示所祭

於北郊及社稷夫祭地惟有夏至北郊方澤之禮此
外則有社祭亦祭地也鄭氏亦既知之矣及注曰禮
天子祭天地大宗伯黃琮禮地典瑞兩圭祀地又曰
地神有二歲有二祭夏至祭崑崙之神於方澤夏至
祭神州之神於北郊何也蓋祭地唯北郊及社稷此
三代之正禮而釋經之正說鄭氏所不能違也有崑
崙又有神州有方澤又有北郊析一事以為二事此
則惑於緯書而牽合聖經以文之也知有正禮而又

汨之以緯書甚矣其惑也○貴與馬氏曰按鄭氏解
經於天地之祀皆分而為二是有二天二地矣然古
人祀天郊與明堂本二處所配之祖又不同則因宗
祀文王於明堂以配上帝一語而指其帝為五精之
帝感生之帝猶云可也至於祭地則經文所載惟方
澤而已乃以為此所祀者崑崙而又有神州則祭之
於北郊蓋北郊之名亦出緯書禮經所不載於是又
因祭灋有泰圻之語而以為泰圻即北郊又非方澤

也其支離不通彌甚矣○後儀王氏曰曲禮疏地祇
有二歲有二祭夏至之日祭崑崙之神於方澤一也
夏至之月祭神州地祇於北郊二也或曰建申之月
祭之與郊天相對○又曰通典王者父天母地故庖
犧氏俯而觀灋焉顓帝乃命火正黎司地以屬人夏
以五月祭地祇殷以六月祭周制夏至禮地祇於
澤中之方丘其丘在國之北禮神之玉以黃琮牲用
黃犢幣用黃繒王及尸同服大裘配以后稷其神州

地祇謂王者所卜居吉土五千里之內地名也王用
兩圭有邸牲用黝犢幣用黑繒其壇於北郊築土為
壇名曰太圻配亦以后稷其樂奏太簇歌應鍾舞咸
池備五齊七獻席橐秸蒲越及雞人呼晨司樂宿垂
掌次設次大宗伯攝亞獻竝如圜丘王每獻酒皆作
樂一終○又曰元符中太常少卿宇文昌齡議曰天
地之勢以高卑則異位以禮制則異宜以樂則異數
至於衣服之章器用之具日至之時皆有辨而不亂

夫祀者自有以感於無自實以通於虛必以類應類以氣合氣然後可以得而親可以冀其格令祭地圜丘以氣非所合以類非所應而求高厚來享不亦難乎

乃奏姑洗歌南呂舞大磬以祀四望註姑洗陽聲第三南呂為之合四望五嶽四鎮四瀆此言祀者司中司命風師雨師或亦用此樂與

疏南呂上生姑洗之九三是陽聲第三也姑洗辰之

氣也三月建馬而辰在大梁南呂酉之氣也八月建馬而辰在壽星是南呂為之合也○陳氏禮書曰天子四望達於四方魯三望泰山河海而已書曰海岱及淮維徐州諸侯之望皆其境內之名山大川也望雖以名山大川為主而其實兼上下之神故詩於柴望言懷柔百神及河喬嶽周禮於望皆言祀而不言祭又典瑞四望與山川異王大司樂四望與山川異樂左氏曰望郊之細也又曰望郊之屬也公羊曰方

望之事無所不通則望兼上下之神可知矣鄭司農
釋大宗伯曰四望日月星海杜預釋左傳曰望祀分
野之星及封內山川許慎曰四望日月星辰河海大
山其說蓋有所受之也鄭康成釋大宗伯曰四望五嶽四
瀆釋大司樂又兼之以司中司命風伯雨師釋舞師
又以四望為四方其言異同不可攷也望之禮有二
而其用不一男巫掌望祀望衍鄭氏讀衍為
延為望祀有牲與棗盛望衍用幣致神而已然鄭

氏於大祝衍祭亦以為延祭禮文殘缺不可攷也望
祀或設於郊天之後或設於巡狩之方或旅於大
故之時則望有常有不常之祀也崔靈恩謂四望之祭
歲各有四不知何據然也望祀其兆四郊其牲各放其方
之色其樂姑洗南呂大磬其玉兩圭有邸其服毳冕
其位茆以辨之而植表於其中周禮所謂旁招以茆
晉語所謂茆蒹設表望是也白虎通謂周公祭泰山
以召公為尸其言無所經見○楊氏曰愚按四望之

說惟鄭氏注小宗伯云四望五嶽四鎮四瀆其說為是蓋言望祭天下之名山大川也所謂懷柔百神者言合祭四方名山大川之神故云百神非必兼上下之神也舜即位類於上帝禋於六宗望於山川徧於羣神類也禋也望也各是一事非望兼上下之神可知也

乃秦蕤賓歌函鍾舞大夏以祭山川註蕤賓陽聲第四函鍾為之合函鍾一名林鍾

疏應鍾之六三上生蕤賓之九四是陽聲第四也
函鍾為之合者蕤賓午之氣也五月建焉而辰在鶉首
函鍾未之氣也六月建焉而辰在鶉火是函鍾為之
合也

乃奏夷則歌小呂舞大濩以享先妣註夷則陽聲第五
小呂為之合小呂一名中呂先妣姜嫄也姜嫄履大人
跡感神靈而生后稷是周之先母也周立廟自后稷
為始祖姜嫄無所妣是以特立廟而祭之謂之閼宮閼神

之

疏大呂之六四下生夷則之九五是陽聲第五也小
呂已之氣也四月建焉而辰在實沈夷則申之氣也
七月建焉而辰在鶉尾是其合也

乃秦無射歌夾鍾舞大武以享先祖註無射陽聲之下
也夾鍾為之合夾鍾一名圜鍾先祖謂先王先公

疏夾鍾之六五下生無射之上九是陽聲之下也夾
鍾卯之氣也二月建焉而辰在降婁無射戌之氣也

九月建焉而辰在大火是其合也○白虎通歌在堂上舞在堂下歌者象德舞者象功君子上德而下功

凡六樂者文之以五聲播之以八音註六者言其均皆待五聲八音乃成也播之言被也

疏劉氏曰六代之樂雖不同而皆用五聲旋相為宮以成其文也假此八物之音以播旋相之文則樂成矣○陳氏曰子合於丑寅合於亥辰合於酉午合於未

申合於巳戌合於卯此皆即其所合者用之也○王先生曰乃分樂而序之以下天地人之次祭也

凡六樂者一變而致羽物及川澤之亦再變而致羸物及山林之亦三變而致鱗物及丘陵之亦四變而致毛物及墳衍之亦五變而致介物及上亦六變而致象物及天神註變猶更也樂成則更奏也此謂大蜡索鬼神而致百物六樂奏而禮畢東方之祭則用太簇姑洗南方之祭則用蕤賓西方之祭則用夷則無射北方之祭

則用黃鍾為均焉每奏有所感致和以來之象物有象在天所謂四靈者天地之神四靈之知非德至和則不至禮運曰何謂四靈麟鳳龜龍謂之四靈龍以為畜故魚鱗不淦鳳以為畜故鳥不商麟以為畜故獸不狘龜以為畜故人情不失

疏郊特牲曰八蜡以記四方又云四方年不順成八蜡不通順成之方其蜡乃通是四方合有八蜡故知四方用樂各別也禮運注云淦之言閃也閃畏人

也商一作獮獮飛走之貌一變至六變不同者據
難致易致前後而言○王先生曰此一節謂四方百
物之祭也○臨川王氏曰羽物輕疾故致之易介物
遲重故致之難象物恍惚無形則其致之尤難川澤
虛故致之易墳衍實故致之難天神遠人而尊則其
致之尤難其餘所致先後大畧如此○何氏曰致者
聲樂奏於此神物應於彼本無一變二變之拘槩言
感通之妙耳讀者不以詞害意可也○郝氏曰象物

魍魎之屬一變至六變極言作樂之盛羽物川澤等
極言感通之遠鄭氏以蜡祭非也○愚按象物成象
於天者日月星辰之類是也天神即昊天上帝及五帝并
無象之可言矣麟鳳龜龍雖為四靈然不離羽鱗毛
介何以獨為象物乎

凡樂圜鍾為宮黃鍾為角太簇為徵姑洗為羽雷鼓雷
鼗孤竹之管雲和之琴瑟雲門之舞冬日至於地上之
圜丘奏之若樂六變則天神皆降可得而禮矣凡樂函

鍾為宮太簇為角姑洗為徵南呂為羽靈鼓靈鼗孫竹
之管空桑之琴瑟咸池之舞夏日至於澤中之方丘奏
之若樂八變則地亦皆出可得而禮矣凡樂黃鍾為宮
大呂為角太簇為徵應鍾為羽路鼓路鼗陰竹之管龍
門之琴瑟九德之歌九磬之舞於宗廟之中奏之若樂
九變則人鬼可得而禮矣註此三者皆禘大祭也先秦
是樂以致其神禮之以玉而裸焉乃後合樂而祭之大
傳曰王者必禘其祖之所自出祭灋曰周人禘嚳而郊

稷謂此祭天圜丘以饗配之圜鍾夾鍾也夾鍾生於房
心之氣房心為大辰天帝之明堂函鍾林鍾也林鍾生
於未之氣未坤之位或曰天社在東井與鬼之外天社
地神也黃鍾生於虛危之氣虛危為宗廟以此三者為
宮用聲類求之天宮夾鍾陰聲其相生從陽數其陽無
射無射上生中呂中呂與地宮同位不用也中呂上生
黃鍾黃鍾下生林鍾林鍾地宮又不用林鍾上生大簇
大簇下生南呂南呂與無射同位又不用南呂上生姑

洗地宮林鍾林鍾上生太簇大簇下生南呂南呂上生姑
洗人宮黃鍾黃鍾下生林鍾林鍾地宮又辟之林鍾上
生大簇大簇下生南呂南呂與天宮之陽同位又辟之
南呂上生姑洗姑洗南呂之合又辟之姑洗下生應鍾
應鍾上生蕤賓蕤賓地宮林鍾之陽也又辟之蕤賓上
生大呂凡五聲宮之所生濁者為角清者為徵羽此
樂無商者祭尚柔商堅剛也鄭司農云九德之歌春秋
傳所謂水火金木土穀謂之六府正德利用厚生謂之

三事六府三事謂之九功九功之德皆可歌也玄謂雷鼓雷鼗八面靈鼓靈鼗六面路鼓路鼗四面孤竹竹特生者孫竹竹枝根之末生者陰竹生於山北者雲和空桑龍門皆山名九磬當為大韶字之誤也

疏禮之以王據天地而裸焉據宗廟天地不裸宗廟無禮神之玉也王者皆以建寅之月郊所感生帝還以感生祖配之若周郊以后稷配之也引大傳者證郊與圜丘俱是祭天之禘郊之禘以后稷配圜丘禘

以魯配○楊氏曰愚按大司樂冬至圜丘一章與禘祭絕不相關而注妄稱圜丘為禘祭灋禘祖宗三條分明說宗廟之祭惟郊一條謂郊祀以祖配天爾而注皆指為祀天太傳禮不王不禘一章言王者禘其祖之所自出諸侯只及其太祖大夫惟有功始祫其高祖所論宗廟之祭降殺遠近爾於祀天乎何與而注妄指為祀感生帝竊嘗疑鄭康成博洽大儒解釋他經最為有功及注此三章則同歸於誤其病果安

在乎蓋讀祭灋不熟而失之也夫祭灋歷叙四代禘
郊祖宗之禮禘文皆在郊上蓋謂郊止於稷而禘上
及乎嚳禘之所及者最遠故先言之耳鄭氏不察謂
禘又郊之大者於是以祭灋之禘為祀天圜丘以嚳
配之以大傳之禘為正月祀感生帝於南郊以稷配
之且祭灋之禘與大傳之禘其義則一皆禘其祖之
所自出也鄭氏強析之而為祀天兩義遂分圜丘與
郊為兩處昊天上帝與感生帝為兩祀嚳配天與稷

配天為兩事隨意穿鑿展轉枝蔓何其謬耶又以祀
五帝五神於明堂而以文王武王配之謂之祖宗夫
孝經所云宗祀文王於明堂以配上帝此嚴父之義
也抗五神於五帝之列而以文王竝配於理自不通
矣況祖宗乃二廟不毀之名於配食明堂何關焉夫
因讀祭灋一章之誤而三章皆誤不惟三章之誤而
已又推此說以釋他經者不一而止疏家從而和之
凡燔柴升煙樂舞酒齊之類皆分昊天與感生帝為

兩等馴至隋唐之際昊天上帝與感生帝二祀常並行而不廢唐世大儒杜佑作通典惑於鄭注大傳之說亦以感生帝與昊天上帝並列而為二是又讀大傳本文不熟而失之也明堂襲鄭氏祖宗之義而以二帝配侑或三帝並配者蓋有之矣幸而王肅諸儒力爭之於前趙伯循與近世大儒辨正之於後大義明白炳如日星而周公制作精微之意可以復見不然則終於晦蝕而不明矣可勝歎哉○貴與馬氏曰按

竝配之制始於唐自鄭康成有六天之說魏晉以
來多遵用之以為曜魄寶亦天也感生帝亦天也均
之為天則配天之祖其尊一也至唐人始以為曜魄
寶五帝皆星象之屬當從祀南郊而不當以事天之
禮事之善矣然感帝之祠既罷旋復雖復其祠而以
為有天帝之分尊卑之別遂於郊與明堂所配之祖
不無厚薄之疑乃至每祭竝配而後得為嚴父之理
然則周公亦豈厚於后稷而薄於文王乎則曷若一

遵初議若郊若明堂皆專祀昊天各以一祖配之而
感帝之屬則從祀於天於禮意人情為兩得乎○爰
儀王氏曰萬物本乎天人本乎祖故冬至祭天而祖
配之氣至之始也萬物成形於帝而人成形於父故
季秋享帝而父配之物成之時也○朱子曰古者祭天
於圓丘埽地而行事器用陶匏牲用犢其禮極簡聖
人之意以為未足以盡其意之委曲故於季秋之
月有大事之禮焉天即帝也郊而曰天所以尊之也

故以后稷配后稷遠矣配稷於郊亦所以尊稷也明
堂而曰帝所以親之也故以文王配焉文王親也祀
文王於明堂亦以親文王也尊尊親親周道備矣然
則郊者古禮而明堂者周制也周公以義起之也○
林氏曰郊祀從簡為報本反始以稷配明堂從備為
大饗報成以文王配稷王業所始文王王業所成從
其類也祭於郊曰天於明堂曰上帝天言兆朕帝言
主宰也故歲祭天者四郊於冬至明堂於秋季祈穀

於孟春大雩於龍見是也歲祭五帝者五周禮所謂
祀五帝亦如是也先言祀上帝次言祀五帝亦如
之蓋言祀青帝赤帝皆如之不可詳數故但曰祀五
帝亦如之亦如之者謂大臣之贊相有司之備具至
其圭幣則各有方色未嘗與上帝混而同也周禮曰
禮東方禮南方月令云四立迎氣故曰歲之祀上帝
者四而祀五帝者五若有故而旅則不在此矣○王
氏曰孝經周公郊祀后稷以配天鄭疏以祭灋有周

人禘嘗之文遂變郊為祀感生帝王肅著論駁之馬
昭抗章固執敕博士張融質之融稱周人祀昊天於
郊以后稷配周禮園丘則孝經之郊聖人因尊事天
因下事地安能復得祀帝嘗於園丘配祀稷於蒼帝
之禮乎且周頌思文后稷配天昊天有成命郊祀天
地則郊非蒼帝肅說為長○又曰按聖證論王肅與
馬昭之徒或云祭天用冬至之日或云用冬至之月
據周禮似用冬至之日禮記郊日用辛似用冬至之

月○又曰隋志儒者各守所見一云祀天之數終歲有九祭地之數一歲有二圜丘方澤一年二行若丘澤之年祭天有九祭地有二若天不通圜丘之祭終歲有八地不通方澤之祭終歲有一此則鄭學所宗也一云唯有昊天無五精之帝而一天歲二祭壇位唯一圜丘之祭即是南郊日南至祭天春又一祭祈農事謂之二祭無別天也五時迎氣皆祭五行之人帝太皞之屬非祭天也文武配祭明堂皆祭人帝此

則王學所宗也梁陳迄隋議者各宗所師故郊丘互有變易○元豐元年置局詳定郊廟禮文陳襄言謹按周禮大司樂以圜鍾為宮冬日至於圜丘奏之六變以祀天神以函鍾為宮夏日至於方丘奏之八變以祀地亦夫祀必以冬至者以陽氣來復於上天之始也故宮用夾鍾於震之宮以帝出乎震也而謂圜鍾者取其形以象天也祭必以夏日至者以陰氣潛萌乎下地之始也故宮用林鍾於坤之宮以萬物

致養乎坤也而謂函鍾者取其容以象地也漢元始中姦臣妄議附會周官大合樂之說謂當合祭乎帝從之天地共牘禮之失自此始由漢迄唐以五月親祠北郊者唯四帝而已如魏文帝太和周武帝建德隋高祖開皇唐睿宗先天皆希闕一時之舉也○三者各於本宮上相生為角徵羽或先生後用或後生先用故云聲類求之也凡言不用者卑之凡言辟之者尊之○信齋楊氏曰愚按禮家或謂郊祀上帝則百

神從祀然乎曰郊之祭也大報天而主日配以月傳
記屢言之竊意垂象著明莫大乎日月日月之明即
天之明也故祭天而主日配以月非必百神悉從祀
也月令仲春大雩帝大雩之後乃命百縣雩祀百辟
卿士季秋大饗帝大饗之後乃使有司嘗羣神告備
於天子先後輕重固有節文矣以此類推之祀天之
後乃祭百神蓋可知也莫尊於天莫重於郊祀精一
以享猶恐誠意之不至豈容混以百神之祀乎舜之

嗣位也肆類于上帝而後禋於六宗望於山川徧於羣神非類於上帝之時合祀六宗百神也告祭之禮簡矣猶有先後之序況郊祀大禮乎大司樂言樂六變則天神皆降者至和感召融液貫通上帝降鑒而百神皆降猶鸞輿順動而千官景從者理也禋祀則專主乎昊天上帝不容混也按三正記曰郊後必有望又凡以神仕者以冬至日祭天神人鬼注云致神鬼於祖廟蓋用祭天之明日恐百神亦然也後之言

禮者失於講明後漢建武元年采用前漢元始中合祭天地六宗羣神從祀二年正月制郊兆於雒陽城南七里泰壇之上至一千五百一十四神不亦褻乎晉賀循已疑其非古人埽地而祭之意此固君子之所不取也○又曰古者祭天地有正祭有告祭禮雖不同義各有當冬至一陽生祀天於圜丘夏至一陰生祭地於方澤所謂正祭也舜之嗣位類於上帝望於山川歲二月東巡狩則柴於岱宗望秩於山川武

王之伐商也底商之罪告於皇天后土又柴望並舉
大告武成成王之營洛也丁巳用牲於郊翌日戊午
乃社於新邑凡因事並告天地有同日而舉有繼日
而舉者此告祭也所謂禮雖不同義各有當者此也
自漢以來分冬至夏至二祀為南北郊然後之人主
未聞以南郊為難而常以北郊為難則諸儒謬誤之
說惑之也按司服王祀昊天上帝則服大裘而冕祀
五帝亦如之唯祀地之服經無明文鄭注亦未嘗及

之賈公彥始為之疏曰崑崙神州亦服大裘可知夫
公彥一時率爾之言未嘗深攷其故豈有夏至陽極
之月而可服大裘哉而崔靈恩孔穎達與杜佑通典
亦為是說於是祀天地之服不問寒暑必服大裘而
北郊遂為不可行之禮至本朝元祐中議北郊禮論
者猶以大裘不可服為言於是始有請於冬至南郊
而合祭天地者矣若顧臨等所言是也有援虞周告
祭之禮以證祀地之正祭者矣如蘇軾之言是因

諸儒一時謬誤之言而欲廢祀地之大典可不惜哉
或曰正祭告祭之禮不同而人主父事天母事地之
心則一也告祭不拘其時不擇其位而可以對越天
地則正祭不拘其時不擇其位奚為不可以對越天
地乎曰因天道之始而祀天因地道之始而祀地以
類求類此報本之祭也當天道之始而祀地於義何
居周公制禮冬至祀天夏至祀地其義不可易矣周
公豈欺我哉○貴與馬氏曰按北郊之議始於元豐

初至元豐六年始罷合祭元祐七年復合祭紹聖以
後復罷之政和四年始親祀地祇於方澤蓋自元豐
六年至宣和之末共四十二年凡十一郊唯元祐七
年一次合祭及政和四年以後四次親祀方澤而已
其餘六郊則遂廢地祇之祀矣夫本以合祭為非禮
分祭為禮至分合之議不決則廢親祠而權以上公
攝事者且二十年蓋病其非禮而反至於廢禮以為
不當祀於園丘而終不能親祀於方澤則固不若一

遵祖宗之灋三歲並祀南郊之為愈也要之周禮冬至圜丘夏至方澤其禮甚正亦無難行者諸儒議論所以不能以時決者其拘牽有二禮文煩縟則憚勞賞齋優渥則憚費如陳古靈之說每遇親郊之歲一日宿大廟以告一日宿北郊以祭地一日宿南郊以祀天是欲以二祀并在一時則不至倍費矣而執禮之勞加甚如曾曲阜之說親郊之歲依古禮以夏至親祠方澤一如郊禮至冬至則舉圜丘之祀是以二

祀分在二時則不至甚勞而賞齋倍費然禮文乃百
王相承之大典不可損畧而賞齋乃五季姑息之敝
政何難更損則如政和三年之詔以郊天後一歲祭
地方澤應奉支賜務從簡省毋使有偏而不舉之失
乃為至論但恐當時方倡豐豫之說煩費未必能省
所以中興之後國勢倥傯則不復能遵而行之也○
潛溪鄧氏曰圓鍾夾鍾也夾鍾生於房心之氣房心
天帝明堂又帝所出之方致大神以為宮不曰夾曰

園以天體言之也天體始於黃鍾終於姑洗以木火土金水為序則宮聲當在太簇徵之後姑洗羽之前當以園鍾為宮角物生之始黃鍾子天氣始於子徵者物之成太簇寅天之功成於寅羽者物之終姑洗辰天之功畢於辰三者皆陽律相繼天之道也林鍾生於未天社在東井與鬼之外西南坤方致地亦以為宮不曰林曰函以地德言也地氣始於大簇終於南呂以木土火金水為序宮聲自當在姑洗徵之後

南呂羽之前故函鍾為宮地之功見於正月成
於三月終於八月林鍾上生太簇太簇下生南
呂南呂上生姑洗相生者地之功也黃鍾生於
虛危之氣虛危為宗廟致人鬼以為宮大呂丑
幽陰之所成太簇幽陰之魄出東方與人接應
鍾亥復歸於幽陰羽聲獨遠於他均者他樂天
地歲事之一終鬼道無窮非若歲事有卒故
盡十二律也子丑寅亥天地始合人受中以生

歸其宅也三者律之相合相合者人之情故以祀人黃鍾屬子自子至申其數九故九變也人鬼不曰至孝子之心神之無不至也此各以其聲類求之然樂亡久矣說者各以其意言之非深於樂親其用不能及也○朱子語類曰黃問周禮祀天地人何以無商音曰五音無一則不成樂非無商音但無商調先儒謂商調是殺聲鬼神畏商調○六變八變九變者謂在天地及廟庭立四表舞人從南表向第二表為一

成一成則一變從第二至第三第四為三成從北向
南表次第亦然○王氏曰書蕭韶九成鳳凰來儀注
韶舜樂名言蕭見細器之備備樂九奏疏經言九成
傳言九奏周禮九變其實一也○三禮義宗樂九變
者舞九終八變者舞八終六變者舞六終終成也○
陳氏樂書曰先王之制管所以通達陰陽之聲然陽
奇而孤陰偶而羣陽大而寡陰小而衆陽顯而明陰
幽而晦孤竹之管與圜鍾之宮合以之降天神取其

奇而孤也。孫竹之管與函鍾之宮合以之出地，亦取其小而衆也。陰竹之管與黃鍾之宮合以之禮人，鬼取其幽而晦也。易曰：方以類聚，物以羣分。於斯見矣。

○王先生曰：此一節天地人之大祭祀下神之樂也。下神之樂用一，代薦神之樂用六，代所謂大合樂。

○薛氏圖云：周人制禮，吉灋之中大祭有三：一曰祭天，圜丘；二曰祭地方，澤；三曰禘祫宗廟。三祭既殊，則其樂亦異。然此三祭皆謂大禘之祀也。此樂是致神之

樂故云作之六變八變九變然後神示鬼皆出降可得而禮也故鄭注先奏是樂以致其神禮之以玉而裸焉然後合樂而祭之明祭時始用六代之樂也○陳氏曰圜鍾為宮黃鍾為角太簇為徵姑洗為羽此律之相次者也函鍾為宮太簇為角姑洗為徵南呂為羽此律之相生者也黃鍾為宮大呂為角太簇為徵應鍾為羽此律之相合者也王先生曰圜鍾為陽律之大太簇為陽律之二姑洗為陽律之三相繼者

天之道故於天言之太簇下生南呂南呂上生姑洗
然先姑洗而後南呂者以相生為言也相生者地之
功故於地言之大呂與黃鍾合子丑也應鍾與太簇
合寅亥也相合者人之情故於人言之○薛氏圖云
凡樂之變數皆用其宮之本數為終黃鍾為宮者黃
鍾在子子數九故九變而終夾鍾為宮者夾鍾在卯
卯數六故六變而畢林鍾為宮者林鍾在未未數八
故八變而止皆用其數為終也然則凡十二調而作

者各用本數爲樂終非獨本數爲三也○雜說夫樂
天地之和也鐘鼓莞絃羽籥干戚蓋其器耳屈伸綴
兆疾徐其文耳以天地之和寓諸器形諸文以是而
祭天則天神可使降以是而祭地則地亦可使出以
是而祭宗廟則人鬼可禮吾豈聞其聲見其形哉得
於想象如在其上如在其左右然後禮行焉易慢之
心不起鄙詐之心不作而鬼神享之矣所謂一變致
羽物之類亦言其可以感動如百獸率舞鳥獸蹢躅

鵲巢可俯而窺之耳胡宏疑之過矣○何氏曰六變八變九變先儒之說不同劉原父曰雲門之樂六變而終咸池之樂八變而終蕤韶之樂九變而終其說最為有理

凡樂事大祭祀宿縣遂以聲展之註叩聽其聲具陳次之以知完否

疏宿縣謂於前宿豫縣之大祭祀舉重者而言實中小祭祀饗燕賓客有樂事皆然

王出入則令奏王夏尸出入則令奏肆夏牲出入則令奏昭夏註三夏皆樂章名

疏王出入謂出入廟門

帥國子而舞註當用舞者帥以往

疏凡興舞皆使國之子弟為之且國子人多當遞代而去故選當用者帥以往也

大饗不入牲其他皆如祭祀註大饗饗賓客也不入牲牲不入亦不奏昭夏也其他謂王出入賓客出入亦奏王夏肆夏

疏大饗有三郊特牲云郊血大饗腥鄭云大饗祫祭
先王一也彼又云大饗尚腍脩謂饗諸侯來朝者二
也曲禮下云大饗不問卜謂總饗五帝於明堂三也
此經云大饗與大饗尚腍脩為一物祭祀則君牽牲入
饗諸侯雖在廟其牲則殺於廟門外因即享之升鼎
乃入故云饗賓客不入牲也○又云鄉飲酒賓醉而
出奏陔夏大饗諸侯左傳曰饗以訓恭儉凡設而不
倚爵盈而不飲獻依命數賓無醉理故賓出入奏肆

夏與尸出入同也

大射王出入令奏王夏及射令奏騶虞註騶虞樂章名在召南之卒章王射以騶虞為節

詔諸侯以弓矢舞註舞謂執弓挾矢揖讓進退之儀

疏諸侯來朝將助祭預天子大射則司樂詔以射之舞節按大射云命三耦取弓矢於次三耦皆次第各與其耦執弓搯三挾一个向西階前當階揖升揖當物揖射訖降揖如升射之儀是其舞節也○王氏曰

天子之射其節比於樂而諸侯之耦王射者亦以舞所以應王也

王大食三宥皆令奏鐘鼓註大食朔月月半以樂宥食時也宥猶勸也

疏按玉藻天子諸侯皆有朔月加牲體之事又知月半者此無正文約士喪禮月半不殷奠則大夫已上有月半殷奠灋則知生人亦有月半大食灋常食亦以樂宥但大司樂不令奏鐘鼓爾

王師大獻則令奏愷樂註大獻獻捷於祖愷樂獻功之樂鄭司農說以春秋晉文公敗楚於城濮傳曰振旅愷以入於晉

疏大司馬云師有功則愷樂獻於社宗伯主宗廟之禮故大司樂獻捷於祖也○後儀王氏曰後漢志短簫鐃歌軍樂也軍樂黃帝使岐伯作以勸戰士即周愷樂愷歌也○愚按古者出兵受成於學及其反也釋奠於學而以訊馘告泮水云矯矯虎臣在泮獻馘

是也然則司樂之大獻其即獻於樂祖歟古人十三舞勺所以學文成童舞象所以學武二十舞大夏則六舞備而文武一之矣先王之教無文事武事之分如此後世二之世道所由以升降也

凡日月食四鎮五嶽崩大傀異哉諸侯薨令去樂註四鎮山之重大者謂揚州之會稽青州之沂山幽州之醫無閭冀州之霍山五嶽岱在兗州衡在荊州華在豫州嵩在雍州恒在并州傀猶怪也大怪異哉謂天地奇變

若星辰奔竇及震裂為害者去樂藏之也春秋傳曰壬午猶繹萬入去籥萬言入則去者不入藏之可知

疏宣八年左氏云辛巳有事於太廟仲遂卒於垂壬午猶繹萬入去籥但卿佐卒輕於正祭故辛巳日不廢正祭重於繹祭當廢之宣公不廢繹故加猶以尤之籥有聲者不入用是以公羊傳曰去其有聲廢其無聲鄭答趙商曰於去者為廢是去者不用廢者入用即萬入是也

大札大凶大戮大臣死凡國之大憂令弛縣註弛釋下之

凡建國禁其淫聲過聲凶聲慢聲註淫聲若鄭衛也過聲失哀樂之節凶聲亡國之聲若桑間濮上慢聲惰慢不恭

疏亡國之聲若桑間濮上者樂記文彼注云濮水之上地有桑間者亡國之音於此之水出也又引史記昔武王伐紂師延東走自沉於濮水衛靈公朝晉過

焉夜聞使師涓寫之至晉晉侯燕之謂晉平公曰寡人聞新聲為公鼓之遂使師涓鼓之晉侯使師曠坐而聽之撫而止之曰昔紂使師延作靡靡之樂武王伐紂師延東走自沉於濮水此淫聲非新聲是其義也○王氏曰凡建國禁淫過凶慢之聲者所以尚中正也淫聲則不正過聲則不中凶聲則不善慢聲則不肅顏淵問為邦孔子告以放鄭聲者此也○仲與郝氏曰暴戾曰凶流散曰慢

大喪涖廡樂器註涖臨也廡興也臨笙師鑄師之屬興
謂作之也

及葬藏樂器亦如之

疏其氏曰謂明器也藏之壙中者檀弓云琴瑟張而
不平笙竽備而不和是也○愚按大司樂掌成均之
灋以樂德樂語樂舞教國之子弟其職重矣三大祭
之外若大射大食大獻去樂弛縣之事何必俱辱國
師耶君子曰三代以上無道藝之分也天官之屬如

亨人宮人所掌極微細猥褻皆以士人為之此設官
深意蓋學術之浮薄皆倡於高談性命而鄙斥日用
之徒性命之說玄穆虛遠易於藏拙至於天下國家
之務實係斯民休戚利病者輒曰器形而下我何知
焉然則萬民之命託於何人乎不得不轉而寄於庸
俗之士甚而寄於胥吏之手大人鉅儒竟為天下不
相關涉之人而性命之學自三代以下遂為無用噫
然則天下何由而治乎大射以助祭大食以養王和

大猷以愷悅祖去樂弛縣凡以敬天怒恤民裁司樂
儼然以國師之尊周旋其間涖其進退之儀舞蹈之
節絕不敢以幾微不屑之心處之則於是尊性命斥
日用之浮習無敢萌諸心即有虛偽之士厭薄下學
倡為渺論衆共指為奇袤而不足貴而一切天下國
家之務莫不各以性命視之此三代學術所以體用
本末兼備而當時民生皆得沐浴於君子道術之中
也

樂師掌國學之政以教國子小舞註內則曰十三舞勺
成童舞象二十舞大夏

疏勺周頌酌序云酌告成大武也言能酌先祖之道
以養天下也象舞者周頌序云維清奏象舞象用兵
時刺伐之舞武王制焉此二者皆小舞二十加冠成
人而舞大夏其實雲門已下皆學○劉氏曰掌國學
之政以教國子小舞者謂小學也古者國子之在懷
抱也能食則教以右手能言則教男唯女俞六年教

之數與方名七年男女不同席不共食八年出入門
戶及即席飲食必後長者九年教之數日之甲子十
年出就外傳居宿於外學書計衣不帛襦袴禮帥初
朝夕學幼儀請肆簡諒十有三年學樂誦詩舞勺成
童舞象學射御

凡舞有帔舞有羽舞有皇舞有旄舞有干舞有人舞註
鄭司農云帔舞者全羽羽舞者析羽旄舞者釐牛之尾
干舞者兵舞者舞者手舞社稷以帔宗廟以羽四方以

皇辟靡以旄兵事以干星辰以人玄謂帔析五采繒皇
雜五采羽如鳳皇色持以舞人舞無所執以手袖為威
儀四方以羽宗廟以人山川以干旱暵以皇

疏按山海經云潘侯之山有獸如牛而節有毛其名
曰旄牛○此六舞者即小舞也若天地宗廟正祭用
雲門以下六舞為大舞即上分樂序之是也○通考
曰帔之為言袞也社稷及百物之神皆為民袞除故
以帔舞也皇陰類而為其類之長陰中之陽也旱暵

則欲達陰中之陽故以皇舞也干者自衛之兵山川有阻固扞蔽之功故以干也○陳氏樂書曰古之於大祭祀有備樂必有備舞春秋書有事於大廟萬舍齋則宗廟用干與羽矣若夫散而用之則有所不備故山川以干社稷以帔四方以羽旱暵以皇二鄭之論疎矣大司樂曰舞咸池以祭地示則社稷不特帔舞大夏以祭山川則山川不特兵舞也於咸池之類言其章不言其器於帔舞之類言其器不言其章互

備也書言舞干羽於兩階樂記比音而樂之及干戚羽旄謂之樂郊特牲明堂位祭統皆言朱干玉戚以舞大武皮弁素積以舞大夏簡兮之詩言碩人俣俣公庭萬舞繼之左手執籥右手秉翟要皆先武後文者蓋堯舜揖遜其舞先干後羽以苗民逆命故也湯武征伐其舞先武後文者以有武功為大故也○貴與馬氏曰按正義以雲門大卷大咸大夏大濩大武為大舞以帔舞羽舞皇舞旄舞干舞人舞為小舞然

以愚觀之雲門以下舞之名也若帔若羽若皇若旄若干若人則舞之具也有此六者之具然後可以舞此六代之舞非於小舞之外別有所謂大舞也蓋六代之舞其名雖異而所用之具則同然必謂之帔舞羽舞云者以其或施之社稷或施之山川旱暵之屬其用各有不同耳舞師所教是各指其所習而言故謂之帔舞羽舞大司樂所教是通指其集成而言故謂之雲門大咸譬之為學帔羽皇旄千人則誦詩

讀書是也雲門至大武則作文是也而誦詩讀書固所以作文也樂書互相備之說得之

教樂儀行以肆夏趨以采薺車亦如之環拜以鐘鼓爲節註教樂儀教王以樂出入於大寢朝廷之儀鄭司農云肆夏采薺皆樂名或曰皆逸詩謂人君行步以肆夏爲節趨疾於步則以采薺爲節若今時行禮於大學罷出以鼓陔爲節玄謂行者謂於大寢之中趨謂於朝廷爾雅曰堂上謂之行門外謂之趨然則王出既服至堂

而肆夏作出路門而采薺作其反入至應門路門亦如之此謂步迎賓客王如有車出之事登車於大寢西階之前反降於阼階之前尚書傳曰天子將出撞黃鍾之鐘右五鐘皆應入則撞蕤賓之鐘左五鐘皆應大師於是奏樂

仲興郝氏曰教國子容儀比於樂以奉王出入也疏若春夏受贄於朝無迎灋受享於廟則迎之若秋冬一受之於廟竝無迎灋若饗食在廟燕在寢則皆

迎此注據大寢言則是燕時若饗食在廟則與此大寢同也○黃鍾陽聲之首陽主動出則撞之右五鍾謂林鍾至應鍾右上靜恐王大動故動以告靜也蕤賓在午陰生之月陰主靜入則撞之左五鍾謂大呂至仲呂左陽主動入靜以告動也大師奏樂謂王出入之時則大師奏采薺肆夏也○王氏曰盛德之至非特動容周旋中於禮而其節又比於樂焉所謂禮樂不可斯須去身也則王之進退有可觀之容可則

之象矣然則樂師之所教者教作樂者也鐘師以鐘鼓奏九夏是已夫行則緩緩則有直而自遂之義故奏肆夏趨則疾疾則欲齊而整肅焉故奏采薺玉藻曰趨以采齊行以肆夏先趨而後行者據以外而入內也○黃氏曰四肢之於安佚人之情也樂徇其情惡勞其形不能非禮勿動而使乘安佚以出之則無所不至矣而況於王乎天下視儀而動聽唱而應者也先王制禮視有旒聽有續言有記動有佩堂上之

行門外之趨為之樂儀以防其肆使聽其聲而其意以誠使顧其體而其氣以正周旋中規折旋中矩進揖退揚而後鏘鳴之佩左中角徵右中宮羽君民事物之意在其中焉非僻之心無自而入是故祭祀朝會師甸封建之時王在五路則其步趨之節責大馭馬五路之上王安佚矣然而顧車之行而聞肆夏之聲則由吾於堂中顧車之趨而聞采薺之聲則由吾於門外王之言動造次無非禮者樂師之所教大馭

之所馭與有力焉○陳氏曰夫王食則以樂侑之言則以樂歌之行則以肆夏采薺節之登車則有鸞和以和之然則王之所以言語飲食行趨登車之際無非禮樂也樂以樂之禮以節之則純和之志不內散而非僻之心無自入焉所謂禮樂不可斯須去身者此也○王氏曰環拜以鐘鼓為節此賓拜之儀也環拜謂旋列而拜以拜者非一也鼓以作之鐘以止之作止應於鐘鼓則其儀不忒矣

凡射王以騶虞為節諸侯以狸首為節大夫以采蘋為節士以采繁為節註騶虞采蘋采繁皆樂章名在國風召南狸首在樂記射義曰騶虞者樂官備也狸首者樂會時也采蘋者樂循瀟也采繁者樂不失職也是故天子以備官為節諸侯以時會為節大夫以循瀟為節士以不失職為節鄭司農說以大射禮曰樂正命大師曰奏狸首間若一大師不興許諾樂正反位奏狸首以射狸首曾孫

疏無問尊卑人皆四矢射節則不同故射人云天子
九節諸侯七節大夫士五節尊卑皆以四節為乘矢
拾發其餘天子五節諸侯三節大夫士一節皆以為
先以聽優尊者故射前節多也○又云先鄭引大射
者證大師用樂節之事云間若一者謂七節五節之
間緩急稀稠如一彼諸侯禮故樂正命大師此天子
禮故樂師命大師也云狸首曾孫者狸首是篇名曾
孫章頭即射義所云是也○禮記射義曰狸首之詩

曰曾孫侯氏四正具舉大夫君子凡以庶士小大莫
處御於君所以燕以射則燕則譽言君臣相與盡志
於射以習禮樂則安則譽也是以天子制之而諸侯
務焉此天子之所以養諸侯而兵不用諸侯自為正
之具也○芸閣呂氏曰王者之仁及鳥獸草木皆如
騶虞則王道成也以此為節言天子繼天當推天地
好生之德也狸首之詩亡矣記有原壤所歌之辭曰
狸首之斑然執女手之拳然狸首田之所獲物之至

尊者執女手者所以道舊結歡也言君臣相與習禮
結歡奉天子以修朝事故諸侯之射以是為節所以
樂其會時也○王氏曰騶虞之詩言蒐田以時仁如
騶虞則王道成王以騶虞為節者樂仁而殺以時也
○按歐陽氏曰賈誼新書騶者文王園名虞者囿之
司獸或曰騶廋官虞山澤之官二職皆不失人則官
備可知毛氏曰騶虞義獸白虎黑文不食生物故小
序云仁如騶虞則王道成也

凡樂掌其序事治其樂政註序事次序用樂之事

疏謂陳列樂器及作之次第皆序之使不錯謬治其樂政者謂治理樂聲使得其正不淫放也

凡國之小事用樂者令奏鐘鼓註小事小祭祀之事

疏小祭有鐘鼓但無舞舞師云小祭祀不興舞是也

凡樂成則告備註成謂所奏一竟書曰蕭韶九成燕禮曰大師告於樂正曰正歌備

疏彼據燕禮此據祭禮事節相當故引為證也

詔來瞽臯舞註詔來瞽詔視瞭扶瞽者來人也臯之言號告國子當舞者舞

及徹帥學士而歌徹註學士國子也徹者歌雍

疏王氏曰徹祭必歌雍者其詩曰有來雍雍至止肅肅相維辟公天子穆穆取其和而敬故也人之情樂於始者或倦於終篤於暫者或怠於久於祭之終猶不失其和與敬此誠之至也

令相註令視瞭扶工鄭司農云告當相瞽師者言當罷

也

饗食諸侯序其樂事令奏鐘鼓令相如祭之儀

疏其中詔來瞽歌徹等皆如之

燕射帥射夫以弓矢舞註射夫衆耦也

樂出入令奏鐘鼓註樂出入謂笙歌舞者及其器

疏劉氏曰奏鐘鼓以聲其出入警其當執事者以為

禮之大節也○郝氏曰樂人及樂器出入亦奏鐘鼓

者重之也樂以和神亦如牲出入者奏昭夏也

凡軍大獻教愷歌遂倡之註鄭司農云樂師主倡也
凡喪陳樂器則帥樂官註帥樂官往陳之

疏喪言凡者王家有大小喪皆有明器之樂器若檀
弓云木不成斲瓦不成味琴瑟張而不平笙竽備而
不和是也往陳之者既夕禮陳器於祖廟之前庭及
壙道東者也

及序哭亦如之註哭此樂器亦帥之

疏小宗伯云及執事眡葬獻明器之材又獻素獻成

皆於殯門外王不親哭有官代之今文承陳樂器之下謂持器向壙及入壙時序哭之也

凡樂官掌其政令聽其治訟

疏凡樂官謂大胥至司干

大胥掌學士之版以待致諸子註鄭司農云學士謂卿大夫諸子學舞者版籍也大胥主此籍以待當召聚學舞者則按此以召之漢大樂律曰卑者之子不得舞宗廟之酎除吏二千石到六百石及關內侯到五大夫子

先取適子高七尺已上年二十到年三十顏色和順身體修治者以為舞者與古用卿大夫子同義

疏按月令四月天子與羣臣飲酎鄭注云酎之言醇謂重釀之酒春酒至此始成祭宗廟用之○王氏曰公卿大夫士之子其父兄有爵列於國也故謂之國子以其衆言之則謂之諸子以其教於學也則謂之學士其實一也○季氏曰觀大司樂禁淫過凶慢之聲而舞者又取卿大夫子有中和祇庸孝友之德者

是聲與人無不正也聲與人無不正則見之聞之者
焉得不正乎

春入學舍采合舞註春始以學士入學宮而學之合舞
等其進退使應節奏鄭司農云舍采謂舞者皆持芬香
之采或曰古者士見於君以雉為摯見於師以菜為摯
采直謂蔬食菜羹之菜或曰學者皆人君卿大夫之子
衣服采飾舍采者損釋盛服以下其師也玄謂舍即釋
也采讀為菜始入學必釋菜禮先師也菜蘋蘩之屬

疏學子始入學釋菜禮輕故不及先聖也先師者鄭
注文王世子云若漢禮有高堂生樂有制氏詩有毛
公書有伏生○藍田呂氏曰釋采禮之至簡者也不
在多品貴其誠也其用有三每歲春合舞則行之月
令云仲春命樂正合舞舍菜是也始入學則行之文
王世子云既興器用幣然後舍菜是也始入大學則
行之學記云大學始教皮弁祭菜示其敬道也○臨
邛魏氏曰古者民以君為師仁壽天鄙君實司之而

臣則輔相人君以師表萬民者也自孔子已前曰聖
曰賢有道有德則未有不生都顯位沒祭大飪者此
非諸生所得祠也自君師之職不修學校廢井牧壞
民散而無所係於是始有師弟子羣居以相講授者
所謂各祭其先師疑秦漢已來始有之而詩書禮樂
各立師不能以相通則秦漢以來為士者斷不若是
之隘也此亦可見世變日降君師之職下移而先王
之道分裂矣然而春秋戰國之亂猶有聖賢為之師

秦漢以來猶有專門為之師故所在郡國尚存先師之號莫祠於學故記人識於禮而傳者又即其所聞見以明之也○陳氏禮書曰釋菜之禮猶摯也婦見舅姑其摯也棗栗脯脩若沒而廟見則釋菜弟子見師其摯也束脩若禮於先師則釋菜大胥釋菜合舞而文王世子釋菜不舞不授器者以釋奠既舞故也士喪禮君視斂釋菜入門喪大記大夫士既殯而君往焉釋菜於門內占夢季冬乃舍萌於四方舍萌釋

菜也則釋菜之禮豈特子弟之見先師婦之見廟而已哉婚禮有奠菜儀弟子之見先師其儀蓋此類歟鄭氏謂婚禮奠菜蓋用董入學釋菜蘋藻之屬始立學釋菜芹藻之屬蓋以泮宮有芹藻子事父母有董萱故有是說也菜之為摯則菜而已采蘋教成之祭毛氏謂牲用魚毛之用蘋藻則詩所謂湘之者毛之也與釋菜異矣

秋頒學合聲註春使之學秋頒其才藝所為合聲亦等

其曲折使應節奏

疏頌分也分其才藝高下○介甫王氏曰以春始入學未知其分藝之所宜至秋而可知也於是分授以所學

以六樂之會正舞位註大同六樂之節奏正其位使相應也言為大合樂習之

疏謂六代之舞一一作之使節奏大同而無錯謬

以序出入舞者註以長幼次之使出入不紕錯

比樂官展樂器註比猶校也杜子春云次比樂官也鄭大夫讀比為庀庀具也錄具樂官展謂陳數之

凡祭祀之用樂者以鼓徵學士註擊鼓以召之文王世子曰大昕鼓徵所以警衆

疏小祭祀不興舞則亦不徵學士也

序宮中之事

王氏曰謂序王宮之中國子之宿衛而學道藝者春秋之所學各有其序如大胥之所掌是也宮正言

比宮中之衆寡會其什伍而教之道藝則大胥序宮中之事者如此也

小胥掌學士之徵令而比之鱣其不敬者註比猶校也不敬謂慢期不時至也鱣罰爵也詩云兕觥其觶

王氏曰大胥掌學士之版以待致諸子小胥校比其多寡之數凡以贊大胥之事而已

巡舞列而撻其怠慢者註撻猶扶也扶以荆扑

陳氏樂書曰周官大胥以六樂之會正舞位小胥

巡舞列經曰行其綴兆行列得正焉蓋位則鄮也所以為綴列則侑也所以為行正之以辨其序巡之以肅其慢則治民勞者鄮遠而侑寡其德殺故也治民逸者鄮短而侑多其德盛故也非故不同凡各稱德而已天子之於諸侯生則旌以舞沒則表以諡觀舞之行綴足以知臨民之德聞諡之異同足以知為治之行然則為諸侯者孰不敏德崇行以法天下後世為哉今之舞者不列於庭而列於堂下其退文進武

不復有出入之序非古人所謂八佾舞於庭序出入舞者之意也至於進退疾徐之際又不復盡筋骨之力以要鐘鼓拊會之節非古人所謂文以揖遜武以擊刺之意也講而習之正今日急務也

正樂縣之位王宮縣諸侯軒縣卿大夫判縣士特縣辨其聲註樂縣謂鐘磬之屬縣於筍虞者鄭司農云宮縣四面縣軒縣去其一面判縣又去其一面特縣又去其一面四面象宮室四面有牆故謂之宮縣軒縣三面其

形曲故春秋傳曰請曲縣繁纓以朝諸侯禮也玄請軒
縣去南面辟王也判縣左右之合又空北面特縣縣於
東方或於階間而已

凡縣鐘磬半為堵全為肆註鐘磬者編縣之二八十六
枚而在一虞謂之堵鐘一堵磬一堵謂之肆半之者謂
諸侯之卿大夫士也諸侯之卿大夫半天子之卿大夫
西縣鐘東縣磬士亦半天子之士縣磬而已鄭司農云
春秋傳曰歌鐘二肆

疏按左氏隱五年考仲子之宮初獻六羽衆仲云夫舞所以節八音而行八風故以八為數樂縣之法取數於此又倍之為十六若漏刻四十八箭亦倍十二月二十四氣故以十六為數也是以淮南子云樂生於風是亦取數於八風之義也○陳氏樂書曰樂縣之制自夏商而上未有聞焉自夏商而下其畧始見於尚書大傳其詳備於周禮春官以書大傳推之自古天子將出撞黃鐘右五鐘皆應黃鐘在陽陽主動

君出則以動告靜而靜者皆和故馬鳴中律步者有容駕者有文御者有數周旋中規折旋中矩立則磬折拱則抱鼓然後奏登車告出也入撞蕤賓右五鐘皆應蕤賓在陰陰主靜君入則以靜告動而動皆和故狗吠燕鳴及保介之蟲莫不延頸以聽在內者皆玉色在外者皆金聲然後少師奏登堂就席告入也然則十二鍾在縣之制權輿於此歟以周禮春官推之大司樂凡樂事大祭祀宿縣遂以聲展之小胥之

職正縣樂之位王宮縣諸侯軒縣卿大夫判縣士特
縣辨其聲凡縣鐘磬半為堵全為肆蓋縣鐘十二為
一堵如牆堵然二堵為一肆春秋襄十年鄭人賂晉
侯歌鐘二肆是也宮縣四面象宮室王以四方為家
故也軒縣缺其南避王南面故也判縣東西之象卿
大夫左右王也特縣則一肆而已象士之特立獨行
也郊特牲譏諸侯宮縣漢武帝高張四縣晉元帝備
四箱金玉豈王宮縣歟春秋譏衛仲叔於奚請曲縣

後光武賜東海恭王鐘簋之樂豈諸侯軒縣歟禮大
夫無故不徹縣楚子享郤至為地室而縣焉田蚡前
庭羅鐘鼓立曲旃豈大夫判縣歟鄉射笙入於縣中
西面東縣磬而已鄉飲磬階縮雷笙入磬南則縮縣
而已豈士特縣歟通禮義纂曰軒縣三面歌鐘三肆
判縣兩面歌鐘二肆特縣一面惟磬而已其說是也
然則鄉射有卿大夫詢衆庶之事鄉飲酒乃卿大夫
之禮皆特縣者也以詢衆庶賓賢能非為已也故皆

從士制燕禮諸侯之禮而工止四人以從大夫之制
意亦類此以儀禮考之大射樂人宿縣於阼階東笙
磬西面其南笙鐘其南鑄皆南陳建鼓在阼階西南
鼓應鼗在其東南鼓西階之西頌磬東面其南鐘其
南鑄皆南陳一建鼓在其南東鼓朔鼗在其北一建
鼓在西階之東南面蕩在建鼓之間鼗倚於頌磬西
絃由是觀之宮縣四面軒縣三面皆鐘磬鑄也判縣
有鐘磬而無鑄特縣有磬而無鐘以王制論之則然

以侯制論之又半於王制矣王制卿大夫判縣東西
各一肆則諸侯之卿大夫東西各一堵王之士特縣
南一肆則諸侯之士一堵可知矣鄭康成曰鐘磬十
六在一虞為一堵杜預曰縣鐘十六為一肆後世四
清之聲興焉是亦傅會漢得石磬十六遷就而為之
志也服虔一縣十九鐘之說不亦詭哉○又曰堂上
之階自階而左為阼自階而右為西笙磬在阼階之
東而面西頌磬在西階之西而面東由笙磬而南鐘

鐃所以應笙者也由頌磬而南鐘鐃所以應歌者也
階雖分乎東西其鐘鐃南陳一也自阼階堂下言之
一建鼓在其階之南而面東朔輦在其北而亦面東
焉一建鼓在其階之東面南蕩在建鼓之間鼗倚於
頌磬之西絃蓋諸侯之樂備三面以為軒縣大射之
儀東西有鐘磬之縣推之則天子宫縣堂上之階笙
磬頌磬各十二縣堂下阼階面南特鐘特鐃亦各十
二縣西階面南編鐘編鐃亦各十二縣天數也○仲

輿郝氏曰凡鐘磬編縣以八為全每縣各八為堵二
八為肆堵者立如堵牆肆者列行成肆天子之卿大
夫士以肆為軒判特諸侯之卿大夫士以堵為軒判
特也○又曰按樂縣不止鐘磬而編縣唯鐘磬故有
半堵全肆之殊詩云應田縣鼓是大鼓小鼓皆縣也
又云簏業惟椌賁鼓惟鏞是大鐘大鼓皆縣也諸侯
以下縣雖不得四面而衆樂皆備則同鄭解鄉射謂
士唯縣磬是以士特縣為不得有鐘鼓矣何以成樂

大師掌六律六同以合陰陽之聲陽聲黃鍾大蕤姑洗
蕤賓夷則無射陰聲大呂應鍾南呂函鍾小呂夾鍾皆
文之以五聲宮商角徵羽皆播之以八音金石土革絲
木匏竹註以合陰陽之聲者聲之陰陽各有合黃鍾子
之氣也十一月建焉而辰在星紀大呂丑之氣也十二
月建焉而辰在玄枵大蕤寅之氣也正月建焉而辰在
娵訾應鍾亥之氣也十月建焉而辰在析木姑洗辰之
氣也三月建焉而辰在大梁南呂酉之氣也八月建焉

而辰在壽星魁賓午之氣也五月建焉而辰在鶉首林
鍾未之氣也六月建焉而辰在鶉火夷則申之氣也七
月建焉而辰在鶉尾中呂巳之氣也四月建焉而辰在
實沈無射戌之氣也九月建焉而辰在大火夾鍾卯之
氣也二月建焉而辰在降婁辰與建交錯貿處如表裏
然是其合也其相生則以陰陽六體為之黃鍾初九也
下生林鍾之初六林鍾又上生大簇之九二大簇又下
生南呂之六二南呂又上生姑洗之九三姑洗又下生

應鍾之六三應鍾又上生蕤賓之九四蕤賓又上生大呂之六四大呂又下生夷則之九五夷則又上生夾鍾之六五夾鍾又下生無射之上九無射又上生中呂之上六同位者象夫妻異位者象子母所謂律取妻而呂生子也黃鍾長九寸其實一簫下生者三分去一上生者三分益一五下六上乃一終矣大呂長八寸二百四十三分寸之一百四大簇長八寸夾鍾長七寸二千一百八十七分寸之千七十五姑洗長七寸九分寸之一

中呂長六寸萬九千六百八十三分寸之萬二千九百七十四蕤賓長六寸八十一分寸之二十六林鍾長六寸夷則長五寸七百二十七分寸之四百五十一南呂長五寸三分寸之一無射長四寸六千五百六十一分寸之六千五百二十四應鍾長四寸二十七分寸之二十文之者以調五聲使之相次如錦繡之有文章播猶揚也揚之以八音乃可得而觀之矣金鐘鐻也石磬也土塤也革鼓鼗也絲琴瑟也木祝敔也匏笙也竹管簫

也

疏六律為陽六同為陰兩兩相合十二律為六合陽聲黃鍾大簇等據左旋而言陰聲大呂應鍾等據右旋而言同位象夫妻異位象子母者同位謂若黃鍾之初九下生林鍾之初六俱是初之第一夫婦一體是象夫婦也異位謂若林鍾上生大簇之九二二於第一為異位象母子但律所生者為夫婦呂所生者為母子十二律呂律所生者常同位呂所生者常異

位故云律取妻而呂生子也○後漢王氏曰後漢律志京房曰十二律之變至於六十猶八卦之變至於六十四也宓戲作易紀陽氣之初以為律濩建日冬至之聲以黃鍾為宮太簇為商姑洗為角林鍾為祉南宮為羽應鍾為變宮蕤賓為變祉此聲氣之元五音之正也故各終一日其餘以次運行當日者各自為宮而商祉以類從焉禮運篇曰五聲六律十二管還相為宮此之謂也○又曰史記生黃鍾術曰音始

於宮數始於一神生於無形成於有形然後數形而成聲○又曰劉歆三統歷曰黃鍾初九律之首陽之變林鍾初六呂之首陰之變參天兩地之灋也○又曰五代會要王朴曰樂作於人心而聲成於物物聲既成復能感人之心昔黃帝吹九寸之管得黃鍾之聲為樂之端半之為清聲倍之為緩聲三分損益之以生十二律十二律旋相為宮以生七調為一均凡十二均八十四調而大備○又曰張昭等議月律有

旋宮之法備於大師之職漢初制氏所調唯存鼓舞
旋宮十二均更用之灋世莫得聞漢元帝時京房善
易別音探求古義以周宮均灋每月更用五音乃立
准調旋相為宮成六十調又以日灋析為三百六十
傳於樂府而編垂復舊律呂無差○又曰陸績注太
玄其說謂陽生於子陰生於午從子至巳陽生陰退
故律生呂言下生呂生律言上生從午至亥陰升陽
退故律生呂言上生呂生律言下生至午而變故蕤

賓重上生○國語泠州鳩曰琴瑟尚宮鍾尚羽石尚角匏竹利制大不踰宮細不過羽夫宮音之主也第以及羽聲以龠樂律以平聲金石以動之絲竹以行之詩以道之歌以詠之匏以宣之瓦以贊之革木以節之鑄之金磨之石繫之絲木越之匏竹鼓而行之以遂八風於是氣無滯陰亦無散陽伶人告龠○管子曰凡聽徵如負豕覺而駭凡聽羽如鳴鳥在樹凡聽宮如牛鳴窳中凡聽商如離羣羊凡聽角如雉

登木以鳴音疾以清凡將起五音凡首先王一而三
之四開以合九九以是生黃鍾小素之首以成宮三
分而益之以一為百有八為徵有三而去其乘適足
以是生商有三分而復於其所以是成羽有三分而
去乘適足以是成角○爾雅釋樂云宮謂之重商謂
之敏角謂之經祉謂之迭羽謂之柳劉歆云宮者中
也君也為四音之綱其聲重厚如君之德而為重商
者章也臣也其聲敏疾如臣之節而為敏角者觸也

民也其聲圓長經貫清濁如民之衆而為經祉者祉也事也其聲抑揚遞續其音如事之緒而為迭羽者宇也物也其聲低平掩映自下而高五音備成如物之聚而為柳也言旋宮之灋以律經辰互生七音各為綱紀故五音以宮聲為首律呂以黃鍾為元言一律五音倫比無間加之二變義若循環故曰一宮二商三角四變祉五祉六羽七變宮其聲從濁至清為一均○太史公曰音樂者所以動盪血脈通流精神

而和正心也故宮動脾而和正聖商動肺而和正義
角動肝而和正仁徵動心而和正禮羽動腎而和正
智故聞宮音使人溫舒而廣大聞商音使人方正而
好義聞角音使人惻隱而愛人聞徵音使人樂善而
好施聞羽音使人整齊而好禮○春秋正義服虔云
乾音石其風不周坎音革其風廣莫艮音匏其風融
震音竹其風明庶巽音木其風清明離音絲其風景
坤音土其風涼兌音金其風闐闐春楊傑曰金聲夫

容失之則重石聲溫潤失之則輕土聲函胡失之則
下竹聲清越失之則高絲聲纖微失之則細革聲隆
大失之則洪匏聲叢聚失之則長木聲無餘失之則
短人稟中和之氣有中和之聲足以權量八音○朱
子鍾律篇曰黃帝使泠倫自大夏之西崑崙之陰取
竹於嶰谿之谷以生而空竅厚薄均者斷兩節間而
吹之以為黃鍾之宮制十二筩以聽鳳凰之鳴其雄
鳴為六雌鳴亦六以比黃鍾之宮而皆可以生之故

曰黃鍾律呂之本其雄鳴者為六律曰黃鍾大簇姑
洗蕤賓夷則無射其雌鳴者為六呂曰大呂夾鍾中
呂林鍾南呂應鍾於是文之以五聲曰宮商角徵羽
播之以八音曰金石土革絲木匏竹而大樂和矣以
之候氣則理之密室尚與地平實以葭灰覆以緹素
以候十有二月之中氣冬至氣至則黃鍾之管飛灰
衝素大寒以下各以其月隨而應焉而時序正矣以
之審度則以子穀秬黍中者九十度黃鍾之長而以

一黍之廣為一分十分為寸十寸為尺十尺為丈十丈為引而五度審矣以之嘉量則以子穀秬黍中者千有二百實其龠以井水準其槩合龠為合十合為升十升為斗十斗為斛而五量嘉矣以之謹權衡則以黃鍾一龠千二百黍之重為十二銖兩之得二十四銖而為兩十六兩為斤三十斤為鈞四鈞為石而五權謹矣舜典曰協時月正日同律度量衡此之謂也○陳氏樂書曰天有六氣降生五味天有六甲地

有五子故六律六呂而成天道所以宣揚六氣九德
究極中和順天地之體合鬼神之德通五行之性遂
萬物之情者也是故上古聖人本陰陽別風聲審清
濁鑄金作鍾主十二月之聲效升降之氣立和適之
音然鍾難分別又截竹為管謂之律者聲之清濁率
濇以長短為制故也黃帝以聽為之遠取諸物也夏
禹以聲為之近取諸身也今夫王者制事立濇物度
軌則一本於六律六律為萬事根本雖濇存形器而

道契精微探蹟索隱鉤深致遠窮天下之妙者莫不
準焉豈非八音之管轄五聲之喉矜也京房欲益中
呂一分且合黃鍾九寸是使周元之度六甲無遷移
歸餘之灋五歲無再閏之期失陰陽之大紀乖律呂
之本原也○俊卿章氏曰夫五音相生而獨宮祉有
變聲何也宮為君商為臣角為民祉為事羽為物君
者灋度號令之所自出也宮故生祉灋度號令所以
授臣臣所以奉承者也祉故生商君臣一德以康諸

務則萬物得所民遂其生矣故商生羽羽生角也然
臣有常職民有常業物有常形不可以遷遷則失其
常矣商羽角三聲此其所以無變也君總萬務不可
執以一方事通萬務不可滯於一隅故宮社二聲必
有變也○陳氏曰國語曰景王將鑄無射問律於伶
州鳩對曰律所以立均出度也古之神瞽考中聲而
量之以制度律均鍾百官軌儀紀之以三平之以六
成於十二天之道也夫六中之色也故名之黃鍾所

以宣養六氣九德也由是第之二曰太簇所以金奏
贊陽出滯也三曰姑洗所以修潔百物考神納賓也
四曰蕤賓所以安靖神人獻酬交酢也五曰夷則所
以詠歌九則平民無貳也六曰無射所以宣布哲人
之令德示民軌儀也為之六間以楊沈伏而黜散越
也元間大呂助宣物也二間夾鍾出四隙之細也三
間中呂宣中氣也四間林鍾和展百事俾莫不任肅
純恪也五間南呂贊陽秀也六間應鍾均利器用俾

應復也律呂不易無姦物也細鈞有鐘無鐃昭其大也
大鈞有鐃無鐘甚大無鐃鳴其細也大昭小鳴和之道也
和平則久久固則純純明則終終則復樂所以成政也
觀此則十二律之名義畧可見矣○陳氏樂書曰金生於土而別於土其卦則兌其方則西其
時則秋其風闔闔其聲尚羽其音則鏗立秋之氣先王作樂用之以為金奏焉周官鐘師掌金奏鐃師掌
金奏之鼓鼓人掌四金之聲音孟子曰金聲是也金

奏之樂未嘗不用鼓特謂之金者以金為主故也禮
曰內金示和也又曰入門而金作示情也國語曰金
奏肆夏莊子曰金石有聲不考不鳴則奏金而鳴之
內以示情外以示和也音之實也○又曰石之為物
堅實而不動其卦則乾其時則秋冬之交其方則西
北之維其風不周其聲尚角其音則辨立冬之氣也
先王作樂擊之以為磬之屬焉蓋金石之樂其聲未
嘗不相應莊子曰金石有聲不攷不鳴國語曰金石

以動之唐李真以木鐸而得徵音之石則其相應可知三代之樂既壞於秦漢漢至成帝尚未有金石之樂及晉武破苻堅之後而四廟金石始備焉後世復以泗濱石其聲下而不和而以華原所出者易之信乎審一以定和難哉○又曰土則埏埴以成器而冲氣出焉其卦則坤其方則西南之維其時則秋夏之交其風則涼其聲尚宮其音則濁立秋之氣也先王作樂用之以為埴之屬焉蓋埴簞之樂未嘗不相應

詩曰伯氏吹埙仲氏吹篪又曰如埙如篪樂記以埙
篪為德音之音周官笙師并掌而教之則其聲相應
信矣○又曰革去故以為器而羣音首焉其卦則坎
其方則北其時則冬其風廣莫其律黃鍾其聲一其
音謹冬至之氣也先王作樂用以為鼓之屬焉蓋鞀
所以兆奏鼓者也二者以同聲相應故祀天神以雷
鼓雷鼗祭地祇以靈鼓靈鼗享人鬼以路鼓路鼗按
樂記亦以鼗鼓合而為德音周官少師亦以鞀鼓并

而鼓之也○又曰絲飾物而成聲其卦則離其方則南其時則夏其聲尚宮其律蕤賓其風景其音哀夏至之氣也先王作樂絃之以為琴瑟之屬焉蓋琴瑟之樂君子所常御其大小雖不同而其聲應一也故均列之堂上焉○又曰木者所以合止樂之器其卦則巽其方東南之維其時春夏之交其風清明其律夾鍾其聲一其音直立夏之氣也先王作樂斲之以為敔柷之屬焉樂記曰作為柷敔德音柷敔以

控楬為用控楬以机敵為體二者之聲一合一止未嘗不相待也○又曰匏之為物其性輕而浮其中虛而通笙則以匏為母象植物之生焉其卦則艮其方東北之維其時春冬之交其聲尚議其律大呂太簇其風融其音啾立春之氣也先王作樂以之為笙等之屬焉記曰歌者在上匏竹在下國語曰匏竹利制蓋匏竹相合而成聲得清濁之適故也○又曰竹之為物其節直而有制其心虛而能通而利制之音所

由出也其卦則震其方則東其時則春其聲尚議其律姑洗其風明庶其音濫春分之氣也先王作樂竅之以為簫管之屬焉

教六詩曰風曰賦曰比曰興曰雅曰頌註教教瞽矇也風言賢聖治道之遺化也賦之言鋪直鋪陳今之政教善惡比見今之失不敢斥言取比類以言之興見今之美嫌於媚諛取善事以喻勸之雅正也言今之正者以為後世法頌之言誦也容也誦今之德廣以美之鄭司

農云古而自有風雅頌之名故延陵季子觀樂於魯時孔子尚幼未定詩書而曰為之歌邶鄘衛曰是其衛風乎又為之歌小雅大雅又為之歌頌論語曰吾自衛反魯然後樂正雅頌各得其所時禮樂自諸侯出頗有謬亂不正孔子正之曰比曰興比者比方於物也興者託事於物

王氏曰一國之事繫一人之本謂之風言天下之事形四方之風謂之雅美盛德之形容以其成功告

於神明謂之頌三者詩之體也直述其事而陳之謂之賦以其所類而況之謂之比以其所感發而比之謂之興三者詩之用也故詩有六義焉○貴與馬氏曰蓋嘗以為詩之體有三曰風曰雅曰頌風雅雖有一國天下之不同然大槩風者閭閻之間民庶之所吟諷所謂陳詩以觀民風是也雅者朝廷之上君臣之所詠歌所謂王政所由廢興是也其詩則施之於宴享頌者美盛德告成功者也其詩則施之於祭祀

然未有三百五篇之前如康衢如擊壤則風之祖也如九歌如喜起如南風則雅之祖也如五子之歌則又變風變雅之祖若頌者獨無所祖書曰八音克諧神人以和又曰搏拊琴瑟以詠祖考來格則祭祀亦必有詩歌而無可考者意者太古之時詩之體未備和氣所感和聲所播形為詩歌被之金石管絃施之燕享祭祀均此詩也未嘗不可通用初不必歌功頌德極揄揚贊歎之盛而後謂之頌也至周之時風雅

頌之別始截然周室既東而詩樂亦頗殘缺失次必
孔子之聖周流四方參互考訂然後能知其說所謂
吾自衛反魯然後樂正雅頌各得其所是也然肆夏
繁遏渠本頌也而叔孫穆子以為天子享元侯之詩
豈周人雅頌亦通用耶或叔孫穆子之時未經夫子
釐正故簡編失次遂誤以頌為雅耶

以六德為之本註所教詩必有知仁聖義中和之道然
後可教以樂歌

疏雜說以德為之本以此知樂乃出於聖人心術之妙○陳氏樂書曰六樂復於後周而後周無成王之治後庭作於大唐而大唐無煬帝之亂此無他樂在人和不在音聲故也

以六律為之音註以律視其人為之音知其宜何歌子貢見師乙而問曰賜也聞樂歌各有宜若賜者宜何歌此問人性也本人之性莫善於律

王氏曰六德中和祇庸孝友也君子之學詩豈徒

誦其空言哉要本之於德而已蓋六德本於性情所以正於中六律稽諸度數所以正於外以六德為之本故雖變猶止乎禮義以六律為之音則書所謂聲依永律和聲

大祭祀帥瞽登歌令奏擊拊註擊拊瞽乃歌也鄭司農云登歌歌者在堂也樂或當擊或當拊登歌下管貴人聲也玄謂拊形如鼓以韋為之著之以糠

疏按尚書云擊石對石擊拊皆作用之名拊非樂器

此司農之義白虎通引尚書大傳云拊革裝之以桴
此後鄭之義後鄭以擊拊若下文鼓鞀及擊應鼗之
類故知拊亦樂器也

下管播樂器令奏鼓鞀註鼓鞀管乃作也特言管者貴
人氣也鄭司農云下管吹管者在堂下鞀小鼓也先擊
小鼓乃擊大鼓小鼓為大鼓先引故曰鞀讀為導引
之引玄謂鼓鞀猶言擊鞀詩云應鞀縣鼓

疏樂器笙簫之屬播謂播揚其聲以歌者在上對匏

竹在下故先鄭曰貴人聲以匏竹在堂下對鐘鼓在庭又有上下之別故後鄭曰貴人氣○陳氏樂書曰古者治定制禮功成作樂舜之為樂夏擊鳴球搏拊琴瑟以詠堂上之樂也以象朝廟之治故繼之祖考來格虞賓在位羣后德讓下管鼗鼓合止祝敔笙鏞以間堂下之樂也以象萬物之治故繼之鳥獸蹌蹌禮記文王世子曰登歌清廟下管象武郊特牲曰歌者在上匏竹在下貴人聲也仲尼燕居曰升歌清廟

示德也下而管象示事也祭義曰昔周公有勲勞於天下成王賜之重祭升歌清廟下而管象燕禮大射曰升歌鹿鳴四牡皇皇者華下管新宮由此觀之周之聲歌不過清廟鹿鳴四牡皇皇者華下管不過象武新宮則舜升歌下管之詩雖無經見要之歌以示德管以示事一也德成於上歌詠於堂上事成於下管吹於堂下豈非無所因為上有所待為下耶極而論之堂上之樂以詠為主堂下之樂以間為主則律

和聲也兩者並用然後上合奏而不失中和之紀矣
然則樂之張陳夏擊必於堂上祝敵必於堂下何耶
曰祝敵器也夏擊所以作器也器則卑而在下作器
者尊而在上貴賤之等也荀卿曰縣一鍾而尚拊大
戴禮曰縣一磬而尚拊為堂上之樂則一鍾一磬尚
拊亦堂上之樂也蓋古者歌詩搏拊而縣興故一鍾
黃鍾之特鍾也一磬黃鍾之特磬也方其工之升歌
也搏拊而鍾磬作焉黃鍾之鍾鳴於堂上而堂下之

編鍾應之黃鍾之磬鳴於堂上而堂下之編磬應之
所以節歌者之句也豈非以歌中聲之詩必假中聲
之鍾磬以發其音耶宋朝堂上之樂不設一鍾一磬
而尚拊臣恐未合先王之制神瞽攷中聲之意也
大饗亦如之大射帥瞽而歌射節註射節王歌騶虞
疏騶虞九節狸首七節采蘋采芣五節之類則大師
為之歌

大師執同律以聽軍聲而詔吉凶註大師大起軍師兵

書曰王者行師出軍之日授將弓矢士卒振旅將張弓大呼大師吹律合音商則戰勝軍士彊角則軍擾多變失士心宮則軍和士卒同心徵則將急數怒軍士勞羽則兵弱少威明鄭司農說以師曠曰吾驟歌北風又歌南風南風不競多死聲楚必無功

疏商屬西方金主剛斷故東方木木主曲直故中央土土主生長又載四行故南方火火主熯怒故北方水水主柔弱又主幽闇故○臨川王氏曰

詔吉凶使知所戒一體之盈虛通於天地應於物類
故占之以寢卜眠之以視象聽之以同律皆得其祥
焉

大喪帥瞽而厥作匱諡註厥興也興言王之行謂諷誦
其治功之詩故書厥作淫鄭司農云淫陳也陳其生時
行迹為作諡

臨川王氏曰史序事王行見於事故太史讀誅瞽
掌樂王德成於樂故太師作諡諡成德之名也○仲

輿邠氏曰德成於樂功歌於頌謚由瞽作也

凡國之瞽矇正焉註從大師之政教

小師掌教鼓鼗祝敔塤簫管絃歌註教教瞽矇也出音
曰鼓鼗如鼓而小持其柄搖之旁耳還自擊塤燒土為
之大如鴈卵簫編小竹管絃謂琴瑟也歌依詠詩也鄭
司農云祝如漆簫中有椎敔木虎也塤六空管如篪六
空玄謂管如籥而小併兩而吹之

王氏曰鼗塤管簫堂下之樂也絃歌堂上之樂也

柷以合樂敔以止樂上下各有之以樂不可無作止之節故也書曰夏擊鳴球搏拊琴瑟以詠夏擊柷敔也此用之於堂上也又曰下管鼗鼓合止柷敔此用之於堂下也

大祭祀登歌擊拊下管擊應鼓註應鼗也應與鼗及鼗皆小鼓也

陳氏曰詩云應田縣鼓爾雅曰大鼓謂之鼗小鼓謂之應大射禮有朔鼗應鼗朔鼗乃所謂鼗也

徹歌註於有司徹而歌雍

大饗亦如之

疏大饗諸侯徹器亦歌雍若諸侯自相饗徹器則歌振驚也○陳氏樂書曰作樂及其小者所以為備也大祭祀大師擊拊鼓棟亦此意歟當堂上擊拊之時則堂下擊應鼓棟以應之然後播鼗而鼓施應於擊拊又施於歌徹其樂之終始歟

大喪與廬註從大師

凡小祭祀小樂事鼓鞀掌六樂聲音之節與其和註和
鐸于

疏鼓人云金鐸和鼓故知和是鐸于也○馬氏曰國
語曰戰以鐸于儆其民也又黃池之會吳王親鳴鐘
鼓鐸于振鐸則鐸之和鼓以節聲樂和軍旅其來尚
矣○王氏曰六樂之作先後曲直則有節而小大清
濁相應而不相陵則和矣

瞽矇掌播鼗祝敔塤簫管絃歌註播謂發揚其音

王氏曰小師教之瞽矇播之

諷誦詩世莫繫鼓琴瑟註諷誦詩謂闇讀之不依詠也
故書莫或為帝鄭司農云諷誦詩主誦詩以刺君過故
國語曰瞽賦矇誦謂詩也杜子春云莫讀為定世莫繫
謂帝繫諸侯卿大夫世本之屬是也小史主次序先王
之世昭穆之繫述其德行瞽矇主誦詩并誦世繫以戒
勸人君也故國語曰教之世而為之昭明德而廢幽昏
焉以休懼其動玄謂諷誦詩主為厥作柅諡時也諷誦

王治功之詩以為謚世之而定其繫謂書於世本也雖不歌猶鼓琴瑟以播其音美之

國語晉司空季子曰黃帝之子二十五人其同姓者二人而已唯青陽與夷鼓皆為己姓青陽方雷氏之甥也夷鼓彤魚氏之甥也其同生而異姓四母之子別為十二姓凡黃帝之子二十五宗其得姓者十四人為十二姓姬酉祁已滕箴任荀僖姁僂依是也唯青陽與蒼林氏同於黃帝故皆為姬姓同德之難

也如是○史記注鄭康成駁異義曰天子賜姓命氏諸侯命族族者氏之別名也姓者所以統繫百世使不別也氏者別子孫之所出故世本之篇言姓則在上言氏則在下也劉向曰世本古史官明於古事者所記錄黃顓以來至春秋時王侯諸國世卿大夫名字號○介甫王氏曰世莫繫當從故書世帝繫古書有謂之帝繫者○王氏曰誦詩則以知民風之厚薄誦世帝繫則以知前世之興衰小史莫世繫則定之

而已非誦之也鼓琴瑟者誦詩及世帝繫也則鼓琴
瑟以合而和之○王氏曰琴瑟是至正之音三者皆
以警戒也○左傳醫和曰先王之樂所以節百事也
故有五節遲速本末以相及中聲以降五降之後不
容憚矣於是乎有煩手淫聲惱埋心耳君子弗聽也
物亦如之至於煩乃舍也已無以生疾君子之近琴
瑟以儀節也非以惱心也天有六氣降生五味發為
五色徵為五聲淫生六疾

掌九德六詩之歌以役大師註役為之使

按九德見大司樂六詩見大師○夾漈鄭氏曰古之達禮三一日燕二曰享三曰祀所謂吉凶軍賓嘉皆主此三者以成禮古之達樂三一日風二曰雅三曰頌所謂金石絲竹匏土革木皆主此三者以成樂禮樂相須以為用禮非樂不行樂非禮不舉自后夔以來樂以詩為本詩以聲為用八音六律為之羽翼耳仲尼編詩為燕享祀之時用以歌而非用以說義

也古之詩今之詞曲也若不能歌之但能誦其文而說其義可乎不幸腐儒之說起齊魯韓毛四家各為序訓而以說相高漢朝又立之學官以義理相受遂使聲歌之音湮沒無聞然當漢之初去三代未遠雖經生學者不識詩而太樂氏以聲歌肄業往往仲尼三百篇瞽史之徒例能歌也奈義禮之說日勝則聲歌之學日微東漢之末禮樂蕭然雖東觀石渠議論紛紜無補於事曹孟德平劉表而得漢雅樂郎杜夔

夔老久矣不肄習所得於三百篇者惟鹿鳴騶虞伐
檀文王四篇而已餘聲不傳大和末又失其三左延
年新得惟鹿鳴一篇每正旦大會太尉奉璧羣臣行
禮東廂雅樂常作者是也古者歌鹿鳴必歌四牡皇
皇者華三詩同節故曰工歌鹿鳴之三而用南陔白
華華黍三笙以贊之然後首尾相承節奏有屬今得
一詩而如此用可乎應知古詩之聲為可貴也至晉
室鹿鳴一篇又無傳矣自鹿鳴一篇絕後世不復聞

詩矣然詩者人心之樂也不以世之污隆而存亡豈
三代之時人有是心心有是樂三代之後無是心心
無是樂乎繼三代之作者樂府也樂府之作宛同風
雅但其聲散佚無所紀系所以不得嗣續風雅而為
流通也按三百篇在成周之時亦無所紀系有季札
之賢而不別國風所在有仲尼之聖而不知雅頌之
分仲尼為此患故自衛返也問於太師氏然後取而
正焉列十五國風以明風土之音不同分大小二雅

以明朝廷之音有間陳周魯商三頌之音所以侑祭也定南陔白華華黍崇丘由庚由儀六笙之音所以叶歌也得詩而得聲者三百篇則系於風雅頌得詩而不得聲者則置之謂之逸詩如河水祈招之類無所系也今樂府之行於世者章句雖存聲樂無用崔豹之徒以義說名吳兢之徒以事解目蓋聲失則義起其與齊魯韓毛言詩無以異也樂府之道或幾乎息矣○又曰三代既沒漢魏嗣興禮樂之來陵夷有

漸始則風雅不分次則雅頌無別次則頌已次則禮
亡按上之回聖人出君子之作也雅也艾如張雉子
班野人之作也風也合而為鼓吹曲燕歌行其音本
幽薊則列國之風也煌煌京洛行其音本京華則都
人之雅也合而為相和歌風者鄉人之用雅者朝廷
之用合而用之是為風雅不分然享大禮也燕私禮
也享則上兼用下樂燕則不得用上樂是則風雅之
音雖異燕饗之用則通及明帝定四品一曰大予樂

郊廟上陵用之二曰雅頌樂辟雍享射用之三曰黃
門鼓吹樂天子宴羣臣用之四曰短簫鐃歌樂軍中
用之古者雅用於人頌用於神武帝之立樂府采詩
雖不辨風雅至於郊祀房中之章未嘗用於人事以
明神人不可以同事也今辟雍享射雅頌無分應用
頌者而改用大予應用雅者而改用黃門不知黃門
大予於古為何樂乎風雅通歌猶可以通也雅頌通
歌不可以通也曹魏準鹿鳴作於赫篇以祀武帝準

騶虞作巍巍篇以祀文帝準文王作洋洋篇以祀明
帝且清廟祀文王執競祀武王莫非頌聲今魏家三
廟純用風雅此頌之所以亡也頌亡則樂亡矣是時
樂雖亡禮猶存宗廟之禮不用之天明有尊親也鬼
神之禮不用於人知有幽明也梁武帝作十二雅郊
廟明堂三朝之禮展轉用之天地之事宗廟之事君
臣之事同其事矣樂之失也自漢武始其亡也自魏
始禮之失也自漢明始其亡也自梁始禮樂淪亡之

所由不可不知也。○貴與馬氏曰按太史公言詩三百五篇孔子皆絃歌之以求合韶武雅頌之音今觀季子請觀周樂而魯人為之歌諸詩二南以下十五國風二雅三頌皆係焉則此三百五篇者皆被之絃歌掌之司樂工師以時肄習之所謂雅樂也蓋非始於夫子而晦菴辨桑中詩序其說曰雅者二雅是也鄭者緇衣以下三十一篇是也衛者邶鄘三十九篇是也桑間衛之一篇桑中之詩是也二南雅頌祭祀

朝享之所用也鄭衛桑濮里巷狹邪之所歌也今不察此乃欲為之諱其鄭衛桑濮之實而文之以雅樂之名又欲從而奏之宗廟之中朝廷之上則未知其將以薦之何等之鬼神用之何等之賓客乎蓋鄭衛國風如桑中溱洧諸篇所言皆淫奔詭浪之辭序者以為刺奔而晦菴盡斥序說以為淫奔之人所自賦之詩故疑其非雅樂也愚以為未然蓋季子所觀樂者周樂也使鄭衛諸詩為里巷狹邪所用則周樂安

得有之而魯之樂工亦安能歌異國淫邪之詩乎然
嘗因是考之詩之被於絃歌也不過以為宴享賓客
祭祀鬼神之用但求之三百五篇惟周頌三十一篇
商頌五篇為祭祀之詩小雅鹿鳴以下彤弓以上諸
篇為宴享之詩此皆其經文明白而復有序說可證
者也至於周南以下十五國風小雅自六月而下大
雅自文王而下以至魯頌之四篇則序者以為美刺
之詞蓋但能言其文義之所主而不能明其聲樂之

所用矣左傳所載列國諸侯大夫聘享賦詩大率多斷章取義以寓已意如秦穆公將納晉文公宴之而賦六月季武子饗韓宣子嘉樹宴之而賦甘棠蓋借二詩以明贊誦之意又如荀林父送先蔑而為賦版之卒章叔孫豹食慶封而為賦相鼠蓋借二詩以明箴規之意它若是者不一而足皆是因事寓意非曰此宴必合賦此詩也獨儀禮所載鄉飲酒禮燕禮射禮工歌間歌合樂之節及穆叔所言天子享元侯與

兩君相見之禮則專有其詩然考其歌詩合樂之意
蓋有不可曉者夫關雎鵲巢閨門之事后妃夫人之
詩也何預於鄉宴而鄉飲酒燕禮歌之采蘋采芣夫
人大夫妻能主祭之詩也何預於射而射禮用之肆
夏繁遏渠宗廟配天之詩也何預於宴飲而天子享
元侯用之文王大明緜文王興周之詩也何預於交
鄰而兩君相見歌之以是觀之其歌詩之用與詩人
作詩之本意蓋有判然而不相合者不知其何說晉

荀偃曰歌詩必類而今如儀禮及穆叔所言則類者
少不類者多若必就其文詞之相類則鄉飲酒所歌
必伐木行葦之屬射禮所歌騶虞而下必車攻吉日
之屬天子享元侯所歌必蓼蕭湛露彤弓之屬方為
合宜

眡瞭掌凡樂事播鼗擊頌磬笙磬註眡瞭播鼗又擊磬
磬在東方曰笙笙生也在西方曰頌頌或作庸庸功也
大射禮曰樂人宿縣於阼階東笙磬西面其南笙鍾其

南鐸皆南陳又曰西階之西頌磬東面其南鍾其南鐸皆南陳

疏眊瞭以扶工也亦兼使作樂云掌凡樂事則播鼗已下至職未皆是也東為生長之方故曰生西為成功之方故曰頌頌者美盛德之形容以其成功告於神明也○頌衆家不音當依字或音容○浚儀王氏曰歌磬編十六枚郊祀設於壇上宗廟設於堂上皆次歌鍾之西以節登歌之句謂之歌磬即周禮頌

磬也

掌大師之縣註大師當縣則為之

凡樂事相瞽註相謂扶工

大喪廡樂器大旅亦如之註旅非常祭於時乃興造其樂器

王氏曰大旅大故而祭亦如大喪陳樂器而不作也

賓射皆奏其鍾鼓註擊棘以奏之其登歌大師自奏之

王氏曰賓射王與諸侯射奏鍾鼓以為之節焉

鑿愷獻亦如之註愷獻獻功愷樂也杜子春讀鑿為憂戚之戚謂戒守鼓也擊鼓聲疾數故曰鑿

典同掌六律六同之和以辨天地四方陰陽之聲以為樂器註陽聲屬天陰聲屬地天地之聲布於四方為作也故書同作銅鄭司農云陽律以竹為管陰律以銅為管竹陽也銅陰也各順其性凡十二律故大師職曰執同律以聽軍聲立謂律述氣者也同助陽宣氣與之同

皆以銅為之

疏陽聲屬天陰聲屬地天地之聲布於四方者此典
同既云掌六律六同即覆云以辨天地四方陰陽之
聲明天地四方陰陽之聲還是六律六同也十二辰
在陽辰為律屬天在陰辰為同屬地此即大師所云
六律左旋六同右轉陰陽相合者也○永嘉陳氏曰
律呂之凖起於黃帝氏律呂之說定於太史公知黃
帝氏之凖而不知太史公之說則難與制律知太史

公之說而未知黃帝氏之灋則雖未能制律而不害其為律矣何者黃帝使伶倫取嶰谷之竹制十二之管吹陽律以候鳳吹陰律以擬凰而十二律之灋由是而定信乎起於黃帝氏者也黃帝氏之灋雖存而太史公之說未出則天下之人雖知律之不可闕於樂而不知所以制律之本雖知律之不可廢於度量衡而不達所以制律之意本不知而意不達則雖斷竹鑄鍾定形穴竅區區用上黨之黍分其短長而較

其合否窮日夜之力以為之未見其能定也然則太史公之說果安在哉蓋太史公之為律書也其始不言律而言兵不言兵之用而言兵之偃及言兵之偃而於漢之文帝尤加詳焉既曰陳武請伐朝鮮而文帝以謂願且堅邊設候結和通使由是而天下富庶雞鳴狗吠煙火萬里可謂和樂者矣又曰文帝之時能不擾亂由是而百姓遂安耆老之人不至市廛遊教嬉戲如小兒狀嗚呼若太史公者可謂知律呂之

時而達制律之意者也何則當文帝時偃兵息民結和通使而天下安樂則民氣歡洽陰陽協和而天地之氣亦隨以正苟制度以候之其氣之相應自然知吾律之為是其氣之不合自然知吾律之為非因天地之正氣以定一代之正律律有不可定者乎古人所謂天地之氣合以生風天地之風氣正而十二律定殆謂是歟然則律呂之說豈非定於太史公者○雜說太師主和聲故合陰陽之聲典同主於制器故

辨天地四方陰陽之序惟太史既合其聲然後付之
典同制器故典同曰掌六律六同之和○介甫王氏
曰天地四方各有陰陽之聲是為十有二聲辨十有
二聲雜比而和之取中聲焉以為樂器○俊卿章氏
曰按歷律志量者籥合升本之黃鍾之籥而五量加
之其濩皆用銅聲中黃鍾以此準之故知用銅也司
農云陽律以竹陰律以銅非也○按上古用竹黃帝
使伶倫取竹於嶰嶠之陰是也至後世用銅

凡聲高聲硯正聲緩下聲肆陂聲散險聲斂達聲羸微
聲黯回聲衍侈聲奔聲鬱薄聲甄厚聲石註玄謂高
鍾形大上上大也高則聲上藏哀然旋如裏正謂上下
直正則聲緩無所動下謂鍾形大下下大也下則聲出
去放肆陂謂偏侈陂則聲離散也險謂偏奔也險則聲
斂不越也達謂其形微大也達則聲有餘若大放也微
謂其形微小也黯讀為飛鉛涅黯之黯黯聲小不成也
回謂其形微圓也回則其聲淫衍無鴻殺也侈謂中央

約也侈則聲迫作出去疾也弇謂中央寬也弇則聲鬱
勃不出也甄猶掉也鍾微薄則聲掉大厚則如石叩之
無聲

王氏曰此鳧氏所謂鍾小而長小而長則形高○
王氏曰此鳧氏所謂鍾大而短大而短則其形下○
鬼谷子有飛鉗揣摩之篇皆言縱橫辨說之術飛鉗
者言察是非語飛而鉗持之飛鉗涅鰭使之不語鍾
聲小不成類之○王氏曰凡聲生於形形異則聲異

○郎氏曰鍾宮聲五聲之首故舉鍾以槩其餘

凡為樂器以十有二律為之數度以十有二聲為之齊
量註數度廣長也齊量侈弇之所容

疏律歷志云古之神瞽度律均鍾以律計倍半假令
黃鍾之管長九十倍半為二尺二寸半以為鍾口之
徑及上下之數自外十一辰皆以管長短計之可知
故云數度廣長也廣則口徑長則上下也侈弇雖鍾
病所容多少則依灋故舉侈弇見文而言也○唐禮

樂志聲無形而樂有器古之作樂者懼器失而聲亡
多為之濫以著之故始求聲者以律而造律者以黍
一黍之廣積為分寸一黍之多積為龠合一黍之量
積為銖兩此造律之本也為長短多少輕重之濫著
於度量權衡三物亦有時而敝又總其濫著於數使
其分寸龠合銖兩皆起於黃鍾使得律者可以制度
量衡因度量衡亦可以制律不幸皆亡則推濫數而
制之四者既同而聲必至聲至而後樂可作矣○范

鎮曰樂者天地之和氣也發和氣者聲音也聲音之
生立於無形聖人以有形之物寓其濫數與尺量權
衡也然皆生於律而復用以定律○玉海古者因鳳
鳴而有律有律而後能備數備數而後能和聲○又
曰黃鍾萬事根本舜同律度量衡謂使尺量衡一稟
於律也

凡和樂亦如之註和謂調其故器也

周禮註疏刪翼卷十四